

MARA EVANGELICAL CHURCH

APAHRANA CHHIHTHANA BU
2021

MISSION CHAKAONA HE THLAHPA RAIHRIA A CHÂ

Pachhualpanohthpa

Rev. Dr. Zôdau

**APHRANA CHHIHTHANA BU
2021**

**Copy Right @ 2021 By
Mara Evangelical Church**

***Design & Layout*
Vabiethai (Alpha & Omega)**

**Author
Rev. Dr. Zôdau**

**Published by
Evangelism & Mission Department
Mara Evangelical Church
Headquarters; Lailenpi/ Sabawngpi
Matupi Township, Chin State
Myanmar**

ACHHÔHBIEZY

Achuna	Page
Biehmiapa	i
Châbu rotuhpa Biehmia	ii
1. Paw Khazohpa ta sawchapawpa nata Thlahpa Pathaihpa tuana	1-2
2. Zisu Krista Mission chakaona nata Thlahpa Pathaihpa	3-5
3. Zisu Krista nata Mission biephuahpa	6-8
4. Zisu Mission prôkrâ miakhana	9-11
5. Zisu Mission prôkrâ mianona	12-14
6. Zisu Mission prôkrâ miathôhna	15-17
7. Zisu Mission prôkrâ miapalihna	18-20
8. Zisu Mission prôkrâ miapangawhna	21-23
9. Khazohpa Mission nata raipie rônahpa	24-26
10. Zisu Krista ta Awnanopa tuana (1)	27-29
11. Zisu Krista ta Awnanopa tuana (2)	30-32
12. Biehraï thiehpa liata Mission patipavyna (part one)	33-35
13. Biehraï thiehpa liata Mission patipavyna (part two)	36-38

14. Biehrai thiehpa liata Mission patipavyna miathôhna (part three)	39-41
15. Mission chakaona cha thokô lo ta lo awpa a châ	42-44
16. Mission chakaona cha sâtâ chariahpa adyuhna raihria a châ	45-47
17. Mission chakaona cha patlâhna raihria a châ	48-50
18. Mission chakaona cha hmasiena raihria a châ	51-53
19. Mission chakaona nata chheipâh pabohsana	54-56
20. Chatlie chakoh kawpa ta chakao byuhpa mission	57-59
21. Mission chakaona he biepie rônahpa a châ	60-61
22. Biehrai parohpa liata Thlahpa Pathaihpa raihria	62-64
23. Mission chakaona liata Thlahpa Pathaihpa raihria	65-67
24. Mission chakaona nata pachhana kipa	68-70
25. Missionaryzy pasôna byhnâ	71-73
26. Thâtihipha cha ngiapâna ta byhnâ tona a châ	74-76
27. Mission chakaona nata beipari sôh	77-79
28. Beihpari cha niepa hlâna a châ	80-82
29. Beihpari cha Zisu pati, Mission chakaona a châ	83-84
30. Marapa nata Mission chakaona	85-87

Biehmiapa

Mara Awnanopa ta eima Awnanopa chana Krizyhna liata Hro apathiehna, thâ apatlôhna, apahrana he eima ngiah chaipa nata peimawh chaipa hawhta apachâ. Cha liata September thla “Apahrana” he kô charei ta Awnanopa Mission & Evangelism Department tawhta pachhuhpanoh tyhpa a châ.

Atakô 2021 September “Apahrana” chata châbu tao awpa liata Rev. Dr. Zôdau Executive Secretary ta “Mission chakaona he Thlahpa raihria a châ” tahpa châbu taopa ta a vaw pachhuhpanoh theipa vâta a chô liata Awnanopa Assembly vyuhpa ta Krista mohta alyna bie eima hla hmeiseih. Awnanopa ahra leipa cha hro taraw ta hma tlah a cha leipa Awnanopa ama châ. Awnanopa ahra maih liata Thlaha thapasana ama hnei lyma, cha tawhta Mission chakaona he â vaw thao tyh. Awnanopa ahra leipa ta Mission chakao theipa châ vei. Mission chakaona he Khazohpa raihria liamarih chaipa nata Krista Zisu â zu chhana chaipa a châ

Chavâta Awnanopa ta Mission chakaona thatlôna ama hnei thei nawpa ta September thla apahrana he ama tao tyhpa hawhta atakô chhao phahnai khoh ngaitapa ta “Apahrana” he Awnanopa mopakha chhôhkha nata khichhôn Awnanopa zydua ta tiama papuapa ta eima hmâ chyu awpa khopasana ahawpa nama cha. Ahra he Krista palôphaona thâpatlôna nata kyhpachâna palaiseihana a châpa hawhta he châbu hmâpa ta Awnanopa zydua ahra chyu su vy!

Rev. A. Rakhai
Executive Secretary (Mission)
Mission & Evangelism Department

Châbu Rotuhpa Biehmiapa

2020 kô September thla apahrana daihti liata Covid-19 vâta zawpi a vaw pakhy thei khao mapi. Chavâta Apahrana chhao phasih hmâ thai khao mapi. 2021 kô eima vaw pha heih February thla tawhta eima râh ryureina riarina vâta Awnanopa chhao rairuna duahmo liata eima vaw y haw heih. Cha hleikhô ta Covid-19 tily ei thôhna he ta maniah vaw chatlao thlu heih ta zawpi a pakhy na zy cha y thai awpa châ khao heih leipa ta kô hro hawhta Apahrana he hmâh thai khao heih aw mapi.

Eima ngiapâna deikua pahasa chy thaipa a châ leipa ta, Mission chakaona chhao a paha thai awpa châ vei. Chavâta atakô Apahrana châta “Mission Chakaona he Thlahpa raihria a châ” tah biepipa hmâpa Apahrana Prôkrâ cha hmâ heih awpa a châ. Guide Bu he Khazohpa Mission pachhuhpanoh dâh zy, Zisu Mission chakao dâh zy, Awnanopa hmiatuapazy Mission chakaona dâh zy, nata MEC Awnanopa ta Mission chakaona raihriana zy nata Mission sôhnawh a châpa Beihpari chakaona nata Thâtihpha Tlô Noh eima Missionary zy alyna dâh pahlaopa a châ. Chavâta Apahrana Bu he Office liata copy hlüh viapa ta pachhuhpanohpa châ ta zawpi a vaw chalei pha u la, chhôn to liata Mission thlahpa mei pa-ia via nawpa ta Apahrana Guide Bu he hmâ pha chy suh vy.

Rev. Dr. Zôdau
ES, Education
July 15, 2021

**PAW KHAZOHPA TA SAWCHAPAWPA NATA
THLAHPA PATHAIHPA TUANA**

*Tuapa ama châ vei khiahta cha kheï ta e bie ama chho thei aw?
(Rm. 10:15a).*

‘Mission’ tahpa hawrawh he Biehraï liata hmôpa y vei. Chahasala Mission cha eima chakao lyma. Mission tahpa hawrawh he Latin reih tawhta a vypa châ ta, a yzie cha “tuapa” tahna a châ. Khazohpa Mission (*Mission Dei*) ama tahpa cha Paw Khazohpa ta Sawchapawpa Zisu tuah ta, Paw Khazohpa nata Sawchapawpa Zisu ta Thlahpa Pathaihpä a tuana kyh a châ. Cha hawhta Sawchapawpa nata Thlahpa Pathaihpä ta Awnanopa cha a tuah pachhuah heih. Cha cha atanoh awnanopa ta Mission chakaona ABeipa Khazohpa tawhta eima vaw hmôpa a châ. Chavâta ABeipa Khazohpa cha Mission zipa châ ta, Missionary beipa chhao a châ.

Paw Khazohpa ta a tuapazy cha Khazohpa Missionary zy ama châ. Paw Khazohpa ta Sawchapawpa Zisu Krista cha atuapa vâta Zisu Krista cha Khazohpa “Missionary” a châ. Cha hawhta Paw Khazohpa nata Sawchapawpa Zisu zy ta Thlahpa Pathaihpä ama tuapa vâta Thlahpa Pathaihpä chhao Khazohpa Missionary a châ hra. Sawchapawpa Zisu nata Thlahpa Pathaihpä ta Awnanopa cha a tua heihpa vâta Awnanopa chhao “Khazohpa Missionary” a châ hra. Khazohpa ta a awpa nata a tuapa maih cha Missionaryzy ama châ. Chavâta Missionary châ thei nawpa miakhana liata peimawhpa cha Khazohpa awna a châ. Abraha cha Ur khihpi liata a y nota chyhsa hluhpi châta byhnâ châ awpa ta aw ta a tuapa a châ (At. 12:1-3). Mawsi chhao Isarel zy Izi seichâna tawhta puakhei ta khehti nata sahpi lona râh Kana râh ngaikhei awpa tuapa a châ hra (Pua. 3:13-17).

Tuapazy cha Khazohpa Missionary zy châ khai ei ta, châhrasala, ama raihria deikua ânano thei aw. Pakhona ta Zisu Krista cha moleipazy pachhana rai hria awpa a châ nota, Thlahpa Pathaihpa cha awnanopa hnohta Khazohpa ypâna nata thlapalôhna rai a hria. Awnanopa deikua he thâtihpha chho awpa a châ. Chavâta he manôh pôh eihrâhpazy hmâpa ta Khazohpa ta a Mission rai cha a hria lymâ. Chavâta Khazohpa missionary zy cha ama khodâh ta rai hria leipa ei ta, a tuatuhpa khohdâh ta mission ama chakao. Cha kyh Zisu Krista chhao ta a reipa cha, “Na tuatuhpa kohpa tao awpa nata a raihria paloh awpa he ei pati a châ” a tah (Zhn. 4:34). Mission chakaona cha py a palyna châta raihria châ leipa ta Khazohpa ta aw ta, a tuapa rai a châ.

Reipahmaoh awpa:

1. Khazohpa Mission tahpa yzie chhopasia teh?
2. Khazohpa ta hmo miakhakha tao awpa ta awna na pahno bâ ma?

Thlarâh
(September)
2

**ZISU KRISTA MISSION CHAKAONA NATA THLAHPA
PATHAIHPA**

Zisu Bâti a châ khai patana ta, ti tawhta thlai vaw pua ta, ano châta avâ a vaw pahy ta Khazohpa Thlahpa cha vachhuh hawhta za chô ta, a chô ta a chohpa hmô ta, avâ tawhta ao ta, “He he ei sawchapawpa kyh ei pachâ ngaitapa, ei ly ngaitapa cha a châ” tah ta. (Mt. 3:16-17).

Mission a pathaotuhpa nata a hneituhpa cha Paw Khazohpa a châ. Chavâta Mission cha Paw Khazohpa tawhta a vaw thao awpa a châ. Khazohpa Mission cha Sawchapawpa Zisu Krista a tuana liata hmô theipa a châ. Zisu Bâtina he atanoh ngiapâtuhpazy bâtina nata a lyu vei. Atanoh ngiapâtuhpazy bâtina cha Zisu Krista cha Abeipa nata Pachhatuhpa ta a py hawpazy awnanopa pitlohpa châ thei nawpa bietaihna a châ. Zisu bâtina deikua “Zisu cha Khazohpa Sawchapawpa Krista a châ tahpa nata Krista raihria awpa pa-ina” a châ. He Mission chakaona awpa ta Paw Khazohpa ta avâ tawhta ao ta â vaw luah. Thlahpa Pathaihpa deikua vachhuh ta a vaw luah. Chavâta Sawchapawpa Mission chakaona awpa ta tuana kyh liata Thlahpa Pathaihpa pahnokheina/ Thlahpa Pathaihpa ta chahnaopa a châzie a palâsa. Zisu bâtina cha Zisu mission chakao thei nawpa ta Thlahpa Pathaihpa ta chahnaona kyh a châ. Mission chakao thei nawpa ta Paw Khazohpa ta sathaw a thuna a châ. Cha sathawthupa a châpa vâta Zisu cha “Krista” tahpa ta ama aw theipa chhao a châ hra.

Thlahpa Pathaihpa cha Paw Khazohpa ta Sawchapawpa Zisu Krista mission chakao awpa ta awna kyh liata pahnokheituhpa a châ hlei khô ta, Zisu Krista Mission chakao pathao thei nawpa ta hmiapahnosana (Orientation) a pietuhpa chhao a châ (Mt. 4:1-11). Cha *orientation* achuna cha atanoh pastorzy *ordination course* ama tah tyhpa hawhpa a châ aw. Paw Khazohpa ta a pahniehpa rai cha chakao bâ awpa a châpa vâta Mission achuna (training) miakha hawhta pachupa a châ. Cha achuna liata bietlâh (subject) mia thôh â chu. Chazy cha, nie rairuna pahniena kyh zy, reithaina nata palyupalihna kyh zy, nata bieheina nata hmotaotheina kyh zy liata a pahnie thei nawpa ta reipasaona a vaw tyh. Cha zydua cha Khazohpa bie hmâpa ta a vaw dyuh lymâ ta a vaw pahnie khai haw.

Chavâta mission chakaotuhpa / Khazohpa rai a hriapa zy cha Khazohpa sathawthuna he peimawh hmiatuapa a châ. Biehra

Parohpa liata chhao Khazohpa ta ano raihria rônahpa chakao awpazy cha sathaw a thu tyh ei. Davi cha Izarel beipa châ awpa ta Samuel ta sathaw a thu (1 Sam. 16:13). Cha hawhta theihthaipa Zadôka nata hrosopa Natha ta Salawmaw cha Izarel beipa châta sathaw ama thu hra (1 Ab. 1:45). Zisu Krista chhaota a pachupa (apostol) zy cha tlâh lâ kiakhei ei ta pachuna a hnei ei. Cha cha *orientation* chuna a châ hra.

Chavâta Awnanopa ta pastor nata missionary zy chahnaona a taotyhpa he chakaona kyh liata peimawh ngaitapa a châ. Pastor tlyma, Missionary tlyma, Hyutuhpa tlyma, Awnano Machâ tlyma, Khichhôn Machâ tlyma, department chhithatuhpa tlyma zy cha chahnaona tlyma, pa-ina tlyma eima hneina he Khazohpa sathawthuna tlu ta a py awpa a châ. Cha hlei khô ta, amozy he ama chakaona nata azaopa ta pachuna *orientation* hnei tyh awpa a byuh. Cha hawhta programme phapa hneina he Khazohpa mission eima chakaona liata eima thatlôna nata eima pahniena a châ aw.

Reipahmaoh awpa:

1. Khapa vâta e Zisu Krista he bâti pachâsa awpa a byuh?
2. Atanoh awnanopa chhituhpazy rai chakaona dâh hmiapahnosana *orientation* pachu tua leipa awnanopa chakaopa he pei na tah ma?

Thlaráh
(September)
3

ZISU KRISTA NATA MISSION BIEPHUAHPA

Abeipa Thlahpa cha ei chôta y ta, dyhchhiepazy hnohta Thâtihpâ chho awpa ta sathaw eina thupa vâta. Ano chata sei atâhpazy hnohta puana bie chhopa nata mochaopazy hnohta mo pavâ heih nawpa kyh zy, taola a taopazy puana awpa ta nata Abeipa palôtlâhna kô tlâh awkhei awpa ta eina tuah," tahpa hi (Lk. 4:18-19).

Khazohpa mission cha Paw Khazohpa ta Sawchapawpa Zisu Krista tuana kyh a châ. Mission chakao awpa ta chahnaona hnei ta, cha cha Zisu bâtina liata eima hmô khai haw. Zisu Krista ta a chakao awpa Mission kyh cha a laiseihna Nazari kih liata phuahna a hnei (Lk. 4:16-30). Biehrâi Thiehpâ athaipazy ta Luka 4:16-30, a eih viapachai ta (4:18-19) he Nazari Biephuahpa (Nazareth Manifesto) tah ei ta, Zisu Krista ta a mission prôkrâ phuah chhieliêna a chapa vâta a mission zydua sypahmaohna a châ ama tah.

Zisu ta mission chakaona tha apasana a pietuhpa he "Abeipa Thlahpa (v. 18a)" ta reih ta, chavâta Zisu Krista mission he a thlahpa ahneipa mission chakaona a cha. Thlahpa Pathaihpâ chhithapa ta mission chakao awpa he Biehrâi Thiehpâ pachu dâh tah theipa a châ. Thatihpâ Luka châbu liata âdo via chai aw. He kyh vâta Luka he Thlahpa Pathaih kyh pahnona a kawhpa (theologian of Holy Spirit) ama tah tyhpa a châ. Luka ta cha Thlahpa raihria he Zisu mission chakaona dei châ leipa ta Awnanopa mission chakaona liata chhao a peimawh kawpa ta a palâsa. Thlahpa Pathaihpâ he mission raihria liata a pathaotuhpa nata a chhithatuhpa ta a reih (Lk. 24:49; Htp. 1:8). Chavâta Mission chakaona cha Thlahpa Pathaihpâ chhithana nata raihria liata aduapa ta chakao awpa a châ.

Zisu Krista cha Paw Khazohpa ta a tua chhana Mission Prôkrâ siano kawpa mia pangawh lâta pachhaihpa ta a reih. 1). Dyhchhiepazy hnohta thâtihpha chho awpa; 2). Sei a tâhpazy puana bie chho awpa; 3). Mochaopazy hnohta mo pavâ hnei heih nawpa kyh; 4). taola a taopazy puana awpa; nata 5). Abeipa palôtlâhna kô tlâh awkhei awpa zy he a châ. Cha biephuahpa mia pangawhpazy cha zawpi hnohta pahnosapa ta a mission rahria awpa cha Zisu ta a phuah. Zisu ta Paw ta a tuapa Mission cha â chhyryhna hawhta chakao awpa ta pachhuahpanoh vei. Thlahpa Pathaihpa ta chhithapa a châ vâta siano kawpa sailuahna a hnei. Achhyryhna hawhta mission chakaona he Thlahpa Pathaihpa chhithana tah awpa châ hri leipa ta, Prôkrâ siano kawpa hneina a châ hri.

Chavâta Khazohpa mission eima chakao tita sailuahna sianopa: daihti pachhohpa nata daihti seiha châta chakaona hnei awpa a byuh. Tuapa missionary zy deichhy nawpa ta sôh tluana hnawh sianopa hnei awpa a byuh. Tua papuapazy ama hria awpa siano hnei awpa a byuh. Awnanopa paduana kyh liata achhuahna sianopa hnei awpa a byuh. Kri pazysana dei châ leipa sala, amo nata amo ta ama dua theina taih anuapa ta achhuahna hnei awpa a châ. MEC ta mission chakaona kô 50 tlohna cha 2016 liata Mission Golden Jubilee tao pi ta, kô 50 chhoh eima chakaona raihria cha eima vaw saipazih ti ta, Mission chakaona sailuahna prôkrâ sianopa a hnei leipa hawhta a vaw lâ. Pitlohpa awnanopa vaw padua thei mapi. Âchhyryh hawhta kô 50 a vaw chakaopa hawhta a vaw lâ. Field chhao mia 6 taih vaw hnei pi ta mopazihna (survey) hnei tua leipa ta field ama vaw pakawh hawhta a vaw lâ. Chavâta Golden Jubilee khô lâta mission chakaona he Zisu Krista ta a mission chakaona Prôkrâ liahsa ta phuahna a taopa hawhta hnei awpa a peimawh kaw aw. Thlahpa ta chhithapa Mission chakaona cha Prôkrâ sianopa a hnei tyh.

Reipahmaoh awpa:

1. MEC Mission biephuahpa reipahmaoh teh?
2. MEC mission chakaona liata na pachâsa khohpa reih teh?

ZISU MISSION PRÔKRÂ MIAKHANA

Amo hnohta, “Kua ula, hmo nama hmôpa nata nama theipazy he Zawhana va chho teh u; mochaopazy ama mo pavâ ta, pheiseipazy phei ta sie ei ta, aphawhpazy pathai ei ta, nahpâpazy nah pavâ ta, athipazy pathyupa ta y ei ta, dyhchhiepany hnohta thâtihpha chhopa châ ta (Lk. 7:22).

Zisu Mission Prôkrâ miakhana cha dyhchhiepany hnohta thatihpha chhona awpa a châ (Lk. 4:18b). Cha kyh vâta Biehrai Thiehpa athaipa hluhpi ta Luka he "dyhchhiepany evangelist" tahpa ta ama pyh. Anodeikua "dyhchhiepa" tahpa yzie chhopsiana deikua ânano hôlô. Biehrai Thiehpa athaipa hluhpi ta Zisu ta "dyhchhiepa" a tahpa he khisatôhtu liata dyhchhiepany tlai ama châ ama tah. Athaipazy ta Zisu Krista daihti liata dyhchhiepany he maluh 100 liata 68 he ama y lyma ama tah. "Dyhchhiepa" tahna cha nie nata do, khihsa tôhtu rairu ta sôthhieh a pachô thei lei penawh tah theipa a cha. United Nation (UN) thliena liata cha noh kha ta dollar 3 (Ks. 4500) ahmô leipazy he sipasana ri thliena ry liata khih a sapa ama tah. Khazohpa chyhsapa he sipasapa ta ypa ta khihsa riethei ngaitapa ta y awpa khoh vei. Chavâta ama hnohta thâtihpha chho awpa he rai rônahpa miakha ta a hmô.

Chavâta Luka châbu liata cha, mochaopa, atlâh leipa, pheisyapa, nahpâpa, aphawhpa, pasaipa-ipa, nodi-dâhphipa, seizy, nata nôhmeipazy chhao dyhchhiepany liata ama hlao (Lk. 4:18; 6:20; 7:22; 14:21; 21:3). Zisu zituhpazy kha dyhchhiepany a tah hra (Lk. 6:20). Dyhchhiepany hnohta mission chakao awpa cha a

sia thlahâ ta Zisu ta kheita he raihria he a hriapazih tahpa deikua achu pâ awpa a byuh hra.

Khazohpa Mission a sie chatlie thei lyma nawpata Khazohpa ta a chyhsazy hmâpa nata a taozie zy hneipa ta a mission cha pati-pavyna a tao. Zisu pachupazy he chino ta hmô theipa a cha: o nata lyu, sôh nata piah, lahpi nata sawzy siesai pa ta Zisu azipa sahlao nata o nata lyu, lapi nata saw zy nata raizy siesai hlei leipata Zisu azipazy sahlaozy ama cha. O nata lyu, lahpi nata saw, sôh nata piah zy siesai pa ta Zisu zina dâh Zisu chakaona dâh a châ. Ato zydua a siesaina kyh cha ano biereipa' "Changiezy khaoh hnei ta, pavawzy bu hnei ta, chyhsa sawchapaw deikua a luh nyu nawpa hnei vei" (Lk. 9:58) liata a lâpasa. Ano hawh tlai ta, a pachupazy cha aw ta, ato zydua ama siesai awpa bie a pie hra ei. He hawh tlai ta tao awpa ta a pachupazy cha Zisu ta bie a pie ei (9:3; 22:35). He hawhta chakaona raihria he ama zibeipa liata ahlâkheina nata pachupazy mâ hneina ta pachâpa a cha (14:33). Zisu ta cha hawhpa a pachupazy cha nohto hro liata ama pachârôh leipa nata Khazohpa abôchha ta, Khazohpa ta a vaw pie awpa liata hnabeiseih awpa ta a pachu hra (Lk. 12:23). Khazohpa ta cha hawhpa pachupazy nie awpa cha a chyhsazy hmâpa ta a pie pyly ei. O nata lyu, lahpi nata sawnah, sôh nata piah zy siesai hlei leipa ta Zisu a zituhpazy cha ama hneina ta Zisu a zipa ama châ. He hawhpa pachupazy he Zisu mission hlaotloh thei nawpa ta a peimawh kawpa ama cha. Pkn. ta Lk. 8:1-4 liata chanôzy kha ama o nata lyu siesai hlei leipa eita Zisu nata a pachupazy cha ama hneina ta nie ama pie lyma. Ama hneina ta Zisu Krista azipazy y vei mawh sala cha Zisu mission hlao tloh thei ngyu aw vei. Ahneina hmâpa ta amopâ tlâh awpazy cha Kuza lapinô Zôana, Zisu nata pachupazy sponsor tuhpa (Lk. 8:3) a châ. Chavâta sipasapazy deichhy awpa nata full time chakaotuhpazy bao awpa ta ahneirôhpazy he Khazohpa ta a hmâh.

Chavâta atanoh eima pastorzy, missionaryzy nata lyuchâpazy cha ama o nata lyu zy siesaipa ta Khazohpa rai a chakaopazy ama châ. Zisu pachupazy chhao kha ama o nata lyuzy; ama raihria chakaona zy siesaipa ta a chakaopazy ama châ. Amozy deichhy thei nawpa ta Zisu Krista ta a chyhsazy hmâpa ta deichhyna a taopa hawhta keimo awnanopa vâtlâhzy chhao, eima pastorzy, missionaryzy nata lyuchâpazy deichhytuh awpa Zisu azipazy eima châ hra. Chavâta eima hneina nata byhnâ topazy hmâpa ta deichhy abyuhpazy he deichhy suh vy!

Reipahmaoh awpa:

1. Sipasapazy he ahy zy ma? chhopasia teh.
2. O nata lyu, nata raihriazy siesai leipa ta Zisu zituhpazy maophaona rei pahmaoh teh?

Thlarâh
(September)
5

ZISU MISSION PRÔKRÂ MIANONA

Areisipazy hnohta thâtihpha chho awpa ta Abeipa ta sathaw eina thupa vâta Abeipa thlahpa cha ei chô ta y ta; ano cha pathipalôh keichheihpazy patlâhsa awpa ta zy, seizy hnohta puana kyh chahrypa ta a ypazy hnohta atâhna o pahyna kyh rei awpazy ta eina tuah (Is. 61:1)

Zisu Krista mission raihria prôkrâ liata mianona cha sei atâhpazy hnohta puana bie chho awpa a châ. He kyh he Pawla nata Sila zy ta lô-o patâhna tawhta pachhapa ama cha awpa kyh (Htp. 16; cf. Lk. 21:24) tlyma? Chanô kô 18 chhoh ahri ta a

patupa patlâhna kyh tlyma a rei va i? tahpa maniah a pachâsa. Athaipa thokha ta sei atâhpazy a tahpa he pawliti kyh vâta patâhna kyh anua via tah eita, anodeikua Zisu ta pawliti kyh adyuh ngapa pahno mapi. Athaipazy cha he sei atâhna kyh he "Sâtâ sei, veikhiah, molei sei atâhna tawhta puana kyh" a cha ama tah hra. Cha tlai cha Zisu ta ei hluhpi ta ataopa a cha. Pkn. ta, Sâtâ ta sei ta a patâhna kyh cha kô 18 chhôn ahripa ta apatupa thâtih (Lk.13:10-17) liata novâh thei pa cha ta, molei sei liata atâhna kyh cha Zisu bie "ahyrai hmo a paraopa maih molei sei a cha" (Zhn. 8:34) tahpa liata pahno theipa a cha hra.

Sei atâhpazy puana kyh liata "puana" tahpa hawh-rawh he Greek reih *afesi* (ἄφεσις – Lk. 4:18 BGT) a yzie cha "papua, pathlie, molei ngiathai" tahna a châ. Biehraï Parohpa liata Isarel zy cha Izi seichâna tawhta nata Zu zy cha Babelaw sei châna tawhta Khazohpa ta a papuana kyh eima hmô hra. Khazohpa chyhsazy Khazohpa a pahno leipazy hnohta sei pachâsapa ama châ tyhpa he politics kyh vâta vaw châ tyh vei. A chyhsazy ama molei tita, chipho thâtlopâ chyhsazy hmâpa ta a chhorei tyh ei. Chavâta Biehraï Parohpa liata Khazohpa chyhsazy sei ama châ tyhpa he ama moleina nata azaona a hnei tyh. Cha hawhta sei tawhta puana chhao molei rona a pamosa tyh hra. Chavâta Biehraï Parohpa liata Khazohpa a chyhsa nawhzy seichâna tawhta a papua tyhpa he Zisu Krista ta khizaw chyhsazy molei seichâna tawhta papuana prôkrâ pamosa chhieliena a châ. Sâtâ seichâna tawhta puana kyh a prôkrâ cha Zisu ta reipasaona (Lk. 4:1-14) tawhta pathao ta ahri papuana rai nata patlâhna rai cha a hriapazih lyma (Lk. 11:14-23; 13:10-17). Zisu ta patlâhna (healing) a taopa maih cha ahripa a dyuhna hawhta a pachâ. Cha tawh heih ta, *afesi* ἄφεσις tahpa hawhrawh he "moleina" hawhrawh nata ama pazia

khoh lymapa (Lk. 1:77; 3:3; 24:47) vâta puana tahpa he molei sei châna tawhta puana tah theipa a cha. cha yzie cha molei ngiathaina a châ. Reikâh hropa ta, molei rona/ ngiathaina kyh a châ aw.

Chavâta Khazohpa Mission liata molei seichâna liata â tâhpazy hnohta thâtihpha chhona he a châ. Cha Prôkrâ liana chata, Zisu Krista pachhana thâtihzy, molei ngiathaina kyhzy, molei rona kyhzy, Khazohpa ngiachhiena kyhzy Khazohpa kyhpachâna kyhzy rei awpa a châ. MEC ta Home mission nata Evangelical Mission (EM) tahpa ta chakaona hnei pita, eima râh liata evangelist chakaona he Home Mission chakaona a châ. Atanoh molei seichâna liata a y chypa eima râh chhôn liata a ypazy nata eima mission field liata a ypazy he sei a tâhna tawhta ama pua thei nawpa ta Zisu Krista ta a Mission biephuahna liata a vaw pahlao chhielie-pa kha a vaw châ.

Reipahmaoh awpazy:

1. Atanoh Mara sawzy ta papua awpa eima byuhpa molei seichânazy paziah teh?
2. Molei seichâna tawhta puana lâthlô reipahmaoh the?

ZISU MISSION PRÔKRÂ MIATHÔHNA

Nohchhô a châ nota nâ tuatuhpa rai ei hria awpa a châ; zâ a châ daimâ hâ hi, cha tina chata ahyhma ta raihria thei khao veih ei. Khizaw liata ei y chhôhta “khizaw khaihpa ei châ” tah ta a chhy ta.

Zisu mission prôkrâ mia thôhna cha "Mochaopazy hnohta mo pavâ hnei heih nawpa kyh" a châ. Mochaopa tah tita pôhpa mokhaoh chaopa châ thei ta, palôhru mochaopa chhao a châ thei. Zisu mission chakaona liata “mochaopazy” tahpa eima hmô (Mat. 11:5; Lk. 7:21; 14:13). Cha dei châ vei, pôhpa mochaopa mopavâsana Zisu ta ataopa ei hluhpi hmôpa a cha (Mt. 9:27; 12:22; 15:30; 20:30; Mk. 8:22; 10:46; Lk. 18:35; Zhn. 9:1). Pôhpa mopavâsa dei cha leipa ta palôhru lâta mochaopa kyh chhao Zisu a reih hra (Mt. 15:14; 23:16; Lk. 6:39; Zhn. 9:39).

Khazohpa ta khizaw a tao tua nota yzie hnei leipa hawhta a y chy (At. 1:1-2). Chahasala, Khazohpa thlahpa ta cha yzie a hnei leipa cha yzie a hneipa ta a tao. Yzie ahneipa khizaw lâta a tao tita miakhana chhaichhi cha Khaihna a châ (At. 1:3). Zohkaluhpa khizaw cha khaihna a vaw y tawhta a yzie a hneipa ngiaryhchhihpa lâta a vaw lie. Khazohpa ta zohkaluhna liata a ypa khizaw cha khaihna vâta yzie a hneipa lâta a vaw lie pathao. Chavâta khaihna thâtih cha Zisu reikâh ta “Kei cha khizaw khaihpa ei châ na” a tahpa cha mochaopa mopavâ-sana liata a palâhâh.

Mopavâsana raihria cha Zisu ta khizaw liata a chakao nota sapa mochaopa mopavâsana nata palôhrupa mopavâsana pachuna ta a hria lymâ. Mopavâsana ta â chhuahpa cha hmodopa hmô thai nawpa cha ta, chhie nata pha pathlua thaina a cha. Cha tlai cha

sona achuna ta â chhuahpa a cha hra. Kaohropa tawhta khiah cha, zohna khizaw tawhta khaihna khizaw lâta apathlaina a châ. Luka châbu liata cha hmô-theina (seeing) he "hmiasiena" (total recognition) hawhta a pachâ hra. Cha kyh cha Zisu ta he hawhta a reih, "moh thlâh ha hra ei sala, hmô thei leipa aw eita, nahthlie thlâh ha hra ei sala, ama no a vâh hlei vei" (Lk. 8:10b) a tah. A pachupazy hnohta "Nama hmo hmôpazy he ahmôna mozy cha a vâhnei kaw na!.... " (Lk. 10:23) tahpa a reih heih hra. He kyh he Luka ta a châbu a thaona Semeona ta Zisu cha "Zenitaihzy hnohta khaihna aluahna" (2:32) nata Batituhpa Zawhana pachuna (3:6) liata nata châbu chhana Emasa lâpi achhieh penawh hnohta (24:13-35) liata a reih. Chavâta mopavâ-sana raihria he Zisu Krista mission liata liamaripa chhao a cha hra.

Atanoh mission eima chakaona liata eima Thâtihpha cha zohna liata a chareipazy pakhaihsa awpa nata mochaopazy mopavâsa nawpa kyh a châ hra. Hro yzie a hnei leipa zy yzie hnei kawpa ta a vaw y thei nawpa ta Mission chakaona a châ. Khaihna kyh/mopavâsana kyh cha kaohropa tawhta reipa a châ khiah, thaisona achuna kyh a châ hra. Mission chakaona liata schoolzy pahypa ta châ eima pachupa cha mochaopazy mopavâsana kyh a châ hra. Chavâta Zisu Krista ta thâtihpha chhona dâh mochaopazy mopavâsa heih na kyh a vaw pahawh chiehpa hawhta MEC awnanopa chhaoa pachuna, hro mâ pahneisana achuna (Life skill training) zy chhao eima pahlaoh cheingei awpa a byuh.

Reipahmaoh awpazy:

1. Mission Prôkrâ miathôhna ta â chhuah chaipa reipahmaoh teh?
2. MEC Mission chakaona liata Zisu Krista Mission Prôkâ miathôhna hriapazihna lâthlôh reipahmaoh teh?

Thlarâh
(September)
7

ZISU MISSION PRÔKRÂ MIAPALIHNA

Papuh, ei sawchapawpa ngiachhie ma y, a riapamipa châ ta, tha ta pasataopa ta, ei hluhpi mei liata tla ta, ei hluhpi ti liata a pao tyh hra (Mt. 17:15).

Zisu mission Prôkrâ mia palihna cha "taola a taopazy puana awpa" kyh a châ. He kyh he kaono lâta pachâ awpa a byuh. Kaokhana liata "moleina vâta taolâ a taopazy" kyh a châ. Sihryhna ta tlyma, avyuhna tlyma, paripangana tlyma, hri-iah ta tlyma nata ahripa ta tlyma a hrona liata biehei ta hropahâhna hnei khao leipa ta riethei a tao ngapazy ama châ. Zakia cha chyhsa hneirôhpa châ taraw ta avyuhna ta ahro liata bie a hneipa vâta chyhsazy ta pathlua haw ei ta, ahrona chhao a ly thei khao vei. Zisu nata atyh awpa a vâ ngâsâpa pakha a châ (Lk. 19:1-10). Sihryhpa chanô cha sihryhna ta ahro liata bie ahnei haw hrapa vâta hro alyna rai hnei hra vei (7:36-50). Biehraireina liata ama palâsa chiehpahawhta ahripa ta a patu hawpa cha mei liata nata ti liata ei hluhpi a paopa a châ (Mt. 17:14-20). Chavâta chyhsa hro riepathei ta hro dopa lâta a chhitha khao leipa maih cha taola pataosatuhpa tah theipa a châ.

Kaonona liata cha athaipazy ta khihtlâh hro nata azaopa taola a taopazy tah awpa a châ ama tah. Thei thai nawpa ta, chanôzy cha Zu nawh phohryhpa hro liata pathlua viapa châ ei ta, Zenitaizy, cha vei khiah, Samari chyhsazy cha Zu nawh ta ama pa-ipa ta ama pathluapa ama châ hra. Khihtlâh phoryhpa vâta tlyma, politi ryureina ryhpa vâta tlyma, sôh thatlôna hmâpa ta tlyma chyhsa riepatheipa maih chhao cha taola pataosatuhpa a châ hra. Eima phoryhpa cha chyhsa hro rie a pathei khiah taola pataosatuhpa a châ. Eima ngiapâna chhao chyhsa rie a pathei khiah cha taola pataosatuhpa a châ hra. Ngiapâna (pachâna)

doleipazy chhao chyhsa hro rie a patheituhpa a châ hra. Cha hawhpa taola pataosatuh tawhta puakhei awpa ta Zisu Krista a khohpa a châ. Chyhsa châta phaohrina a pietuhpazy cha Zisu Krista ta a parao lyma. Zu dêryhpa chhao parao ta, Zu phoryhpa Zenitaipa nata Samari chyhsa zy pathluana cha a parao lyma. Chavâta Zisu mission chakaona liata khihtlâh hro paduana chhao a hlao hrpa a châ.

Chavâta atanoh eima râh liata taola maniah a pataosatuhpazy hry liata miakha cha sahma he a châ. Atanoh sahma ta taola a pataosapa thyutliazy hluhpi eima y haw. Sahma do leipa ta y thei khao tloh leipa ei ta, thokha cha sahma do awpa hmahta a hnei leipa eima châ heih. Rev. Dr. Hrekio ta a reina liata “Chin chyhsazy eima hrona maniah a pahlei chaipa he chariahpa châ vei, sahma tlai he a châ” a tah. Atahma chhathiehpa liata sahma dona vâta Bike nata mawtaw accident he rei tiah lei a châ. Kôkha liata sahma vâta a thipa Chin State liata a chyh chai ta mo 200 hlei a pha lymâ. Sahma vâta nôvah a chhaihnazy, chhôhkha buanazy, leibâh hluhpi hneinazy a tyh nga pi ta, Mara sawzy chhao he sahma taolana tawhta kheita eima pua thei aw tahpa he miakhana liata pachâ khipa a châ haw.

Eima râh liata taola maniah a pataosapa miakha heih cha nôpakia kyhchhina phoryhpa he a châ. Zakha liata zakha a do leipa chhaota ahluk via âdopa cha nôpakia kyhchhi he amâ â sah tupa vâta satlia thokha cha amâ nao viapa paryhpa ta kyhchhi zy he ama tlyh. Eima râh soh tluana duahmo nata ahmiepa ta chyhsa to kyhchhi theipa nôpakia kyhchhi he hnei theipa châ sala a pha kaw ba aw.

Reipahmaoh awpa:

1. Eima râh liata hro phaohri maniah pie chaipazy reipahmaoh teh?
2. Sahma taolana tawhta eima pua thei nawpa lâthlô reihpahmaoh teh?

Thlarâh
(September)
8

ZISU MISSION PRÔKRÂ MIAPANGAWHNA

Khazohpa ngiachhiena nama hmôpa cha phahnai khohpa ta ano hrialâhpa nama châ nawpata ei cha haw ei. Khazohpa ta, “daihti rypaohna liata cha nahthlie aw na ta, pachhana noh liata ei cha bao aw.” tah tlôh ta. Atahma he daihti rypaohpa châ ta, atahma he pachhana noh cha a châ. (2 Kaw. 6:1-2).

Zisu mission Prôkrâ mia pangawhna cha "Abeipa palôtlâhna kô tlâh-awkhei awpa" a cha. Athaipa hluphi ta Lk. 4:19 he "Lk. 4:18-pa syhpahmaohna" a châ ama tah. A yzie cha a chôlâ liata mission chakaona kyh kha "Abeipa palôhtlâhna" hawhta hmô awpa a châ. Kaohropa lâ tawhta, Abeipa palôhtlâhna kô tahpa cha "Zubili kô" tahna a cha. Chavâta Theithaina 25:10 liata hmo yzie pachâ awpa a byuh. Zubili tahpa cha Hebrai reih *yobel* a yzie "mietaku ki" tawhta a vy ta, kô 7 sai ta ei 7, a zydua 49 tawhta kô 50-na he a châ. Cha kô liata Izarel nawhta alyna kyhchhi tao aw eita mietaku ki ama tôpa a châ. Chavâta Zubili kô cha Abeipa palôhtlâhna kô ta taopa a châ.

Abeipa palôtlâhna kô tahpa cha daihti noh a châ. Zisu ta Nâzari achhyna o liata a phuahpa bie he Isai 61:1-2 bie tawhta a châ. Isai 61:2 liata eima hmôpa cha, “Abeipa palôtlâhna kô nata Khazohpa phuhlana noh” tahpa hmô pi ta, anodeikua, Zisu ta a rei ti ta, “Khazohpa phuhlana noh” tahpa reih pahlao khao vei. A yzie cha Zisu daihti he Khazohpa phuhlana daihti châ khao leipa ta ngiachhiena daihti a châ hawpa vâta a châ. Chavâta Abeipa palôtlâhna daihti Khazohpa ngiachhiena daihti a châ. He daihti cha Khazohpa ngiachhiena, chatlaina nata pachhana daihti a châ. Ahyrai molei rona nata ngiapâna chôta Krista hnohta a vypa maih

chhazaw hrona ama hmô aw. Ngiachhiena daihti liata a chyhsazy tovyuh phuahna kyh a châ. Khapa vâta ma Abeipa ta a palôh a tlâh? tahpa bie hiahri awpa a châ. Zibili kô he Izarelzy ta Khazohpa molei ngiathaina cha kô palâsana ta hmâ tyhpa châ ta, cha kô cha ama hry liata molei ngiathaina, leibâh ngiathaina, sei atâhpazy puana ta hmâpa a châ vâta Abeipa Khazohpa ta alypa a châ.

Chavâta keimo Mara awnanopa chhaota Zisu Krista Mission chakaona a pazao lymâpa eima châpa hawhta Khazohpa palôtlâhna kô cha eima phuah lymâpa a châ hra. He liata hmo miakha eima chupa cha moleina rona liata Khazohpa a palôh a tlâh tahpa hi. Cha kyh vâna heta hrosopa ta, “nama maophyuhna vyuhpa ta a lie no ta hmô aw ei chi ta (Is. 61:7)” a tah. A yzie cha molei ropazy hnohta pie awpa cha “byhnâ lie no (double blessing)” a châ. Cha bie cha sawchapaw leidiapa a paw hnohta a vaw kuapa hnohta poh thiehpa pabu ta, kusadi paky ta, pheiky paky ta, viachao thawhpa ta kyhchhi a tao. Paw ta a sawchapaw molei ropa ta a vaw kuapa hnohta palôtlâhna a palâsa. A utapa chhao molei ropa ta a paw ta a palyupalihpa cha a hiatlia hialiana taih a châ (Lk. 15:11-32). Chavâta molei ngiathaina he Khazohpa ngiachhina daihti liata a ypa châ ta, atahma tlai he rypaohna noh nata pachhana noh a châ.

Reipahmaoh awpa

1. ABeipa palôtlâhna kô tahpa chhopasia teh?
2. Ahy zy ma byhnâ lie no a to thei aw ei?

Thlarâh
(September)
9

KHAZOHPA MISSION NATA RAIPIE RÔNAHPA

Chatanachata sie u la, pho ta pachupa ta tao u la, Paw nata Sawchapawpa nata Thlahpa Pathaihpâ moh ta a bâti teh u. bie ei cha piepa zydua kha avaopa ta pachu teh u; nathlie teh u, chhazaw chhâna taih ta nama hnohta ei y thlahâ aw, khizaw chhana taih chhaota tah ta (Mt. 28:19-20).

Mission chakaona liata ama pahnieh chaioa Biehrai bie cha he biepie rônahpa he a châ. Raipie rônahpa he Zisu Krista ta a pachupazy a tuana kyh a châ. He hawhta Zisu Krista ta a pachupazy cha raihria siano kawpa pahniehpa ta a tuah ei. Cha raipie rônahpa cha biehneina zydua hria awpa a châ. Pho to zydua hnohta hria awpa a châ hra. Biepiepa zydua cha pachu ta, Khazohpa ypâna cha chha zydua liata bietaihpâ ama châ.

Raipie rônahpa he achhuahna cha pachupa ta tao awpa he a châ. Raipie rônahpa (Mt. 28:16-20) liata hawrawh peimawhpa "pachupa ta tao" "bâti" nata "pachu" tahpazy mia 3 a y. Cha liata pachupa ta taona he a tlâhpipa châta ahropazy bâtina nata pachuna zy he pachupa ta taona chhopasiana a châ. Chavâta pachupa ta taona kyh he batina kyh tawhta achu theipa a cha. Biehrai Thiehpâ athaipazy ta bâti pachâsana he awnanopa maluh papôhna, cha vei khiah, awnanopa pakawhna ta novâh awpa châ vei. Anodeikua, bâtina he "molei ngiathaina" ta novâh awpa a châ. Molei ngiathaipazy ta pachupa ta châ pathaona a cha. Molei ngiathaina he Luka (24:47) nata Zawhana (20:21-23) liata hawhta Mathai liata a siapa ta palâsapa châ vei hra sala, bati pachâsana ta molei ngiathaina kyh phuah awpa a cha. Mathai ta Zisu cha "ama moleina tawhta pachha awpa" (1:21) tahpa hmia a pahnosâ. Zisu thlachha pachu liata "hmo maniah a bâhpazy eima ngiathaipa hawhta, keimo chhao eima a bâhpazy maniah angiah thai mah y"

(6:12). Zisu ta Zâpati dôhna liata "he he ei thisaih, moleinazy a ngiathai nawpa ta chyhsa hluphi châta a lohpa...." (26:28) a reih. Chavâta Mathai ta molei ngiathaina kyh he batina liata pahlaio ta cha cha mission chakaona sakha a cha hra. Luka ta molei sei a tâhpazy puana kyh a reipa nata a lyu hra. Hawrawh hropa tawhta "moleina liata thina, nata Khazohpa liata hrona ta ataona" tahpa ta Pawla ta a chhopsia (Rawma 6:18). Chavâta batina cha achâhkheina (witness) ama tah tyh. Khazohpa cha eima hro liata a hro haw tahpa Khazohpa ypâna phuahna chhao a cha.

Bâti pachâsa khai tawhta biepiepa zydua pachu awpa a châ. Eima pachu awpa deikua Khazohpa biehai he a châ. Athaona châbu tawhta Biephuah Châbu taih eima pachu awpa a châ. Khazohpa bie he ngiapâtuhpazy châta peimawh chaipa a châ. Zisu ta reih ta, chyhsapa cha viahchha deita ta hro leipa ei ta, Khazohpa pakâh tawhta a puapa bie to ama hroh aw a tah (Mt. 4:4). Khazohpa bie ama pachu leipa awnanopa cha ti bao leipa chicheipa hawhta a châ (Hla. 1:3). Thothei kô lo chhâna cha thei pathei awpa a châpa hawhta Bâti pachâ chiehpa awnanopa cha thei a patheipa awnanopa a châ awpa hnabei eima seih. Chavâta pachupa ta taona he thokô lo ta lo awpa a châ. Thei hluphi patheina taih khâsia awpa a châ.

MEC awnanopa ta mission a chakaona chhao he athei hluphi pathei thei nawpa ta chakao awpa a châ. Thâtihpha chho tahpa cha raipie rônahpa chakaopa hawhta thâtihpha chhopa ta bâti pachâsa ta moh rona dei châ vei. Awnanopa pitlohpa a vaw dua thei nawpa ta pachupa ta tao awpa a châ. Mission Golden Jubilee saipazihna liata cha kô 50 eima vaw siena liata bâti pachâsana liata daihti vaw pachhâ haw pita, pachuna raihria deikua ama vaw hria chyhpa vâta pitlohpa awnanopa vaw padua thei mah ma pi. Chavâta MEC Mission he "Pachupa ta taona" lâta tha ta eima tiama via awpa a byuh.

Reipahmaoh awpa:

1. Raipie rônahpa tahpa cha khapa a châ reipahmaoh teh?
2. Pachupa ta taona he na pahnona dâh hawhta chhopsia teh?

Thlarâh
(September)
10

ZISU KRISTA TA AWNANOPA TUANA (1)

Chahrasala, Thlahpa Pathaihpa nama chô ta a vaw tlô tita hmotaotheina nama hnei aw. Chatanachata Zerusalem liata zy, Zudia râh nata Samari râh khi to liata zy, kaoki taih chhaota ei bie pahnokheituhpazy nama châ aw tah ta (Ht. 1:8).

Khazohpa Mission liata Zisu Krista nata Thlahpa Pathaihpa ta awnanopa tuana he miakha a châ. Thlahpa Pathaihpa raihria nata mission chakaona azaona chhao he liata a sia viapa ta eima pahno. Zisu Krista cha thyuheih khai tawhta noh sypalih khizaw liata y ta vârah lâ a kiah haw. Ht. 1:8 he Vârah lâta a kia chy ta a reipa bie a châ. Vârah lâ a kia tawhta noh hrawh a pha tawhta Thlahpa Pathaihpa cha a vaw tuah. Thlahpa Pathaihpa a tua noh cha Petikaw (Penticost) noh tahpa pahnop a châ. “Thlahpa Pathaihpa nama chô ta a vaw tlô tita” a tahpa noh kha a châ. Thlahpa Pathaihpa eima tona chhâpa cha mission chakaona vâta a châ tahpa he liata a siapa ta â lâ. Zisu Krista tlai chhao kha a bătina liata Thlahpa Pathaihpa patosapa châ ta, cha kyh cha, “Abeipa Thlahpa cha ei chôta y ta, dyhchhiepany hnohta Thătihpha chho awpa ta sathaw eina thupa vâta” (Lk. 4:18) liata Zisu a rei ngapa kha a châ hra. Chavâta Mission chakaona thlahpa cha Thlahpa Pathaihpa a châ. Mission chakaona thapasana a hneipazy he Thlahpa Pathaihpa ama tona ngiana sakha a châ thei hra.

Thlahpa Pathaihpa cha piepa eima châpa vâta Thlahpa Pathaihpa cha ngiapâtuhpazy hnohta y lymâ bâ aw ta, cha chhao

cha Abeipa Zisu Krista ta bie liahsa maniah a taihpa kha a châ hra (Zhn. 14:16). Khazohpa mission liata cha Thlahpa Pathaihpa he mission thlahpa maniah a pie deita châ leipa ta, Mission chakaona liata Khazohpa ypâna bietaih eima tona chhao a châ. Chavâta Khazohpa Thlahpa tlai ta a mission chakaona liata maniah â pahlao lymâ aw. Riahpha kawpa ta Mission chakao awpa a châ. Khazohpa cha sapa lâta a vaw lie ta eima hnohta a pahra (Zhn. 1:14), cha cha Zisu Krista a châ. Zisu Krista cha kô sythôh hlei khizaw liata Paw ta rai a pahniehpazy cha chakao ta chakaona patlôpa ta vârah lâ a kiah haw. Vârah lâ a kia chy ta, a siesai awpa nôpopa ta a ypa a pachupazy thlah palôh ta, ama hnohta Thlahpa Pathaihpa cha bie â taihpa ei kha a châ. Bietaihpa liata ngâchhih kawpa ta a pakituhpa chhao a châ. Chavâta Khazohpa mission chakaona liata tha maniah a patlôtuha nata maniah ypâ ta thla maniah a palôtuha cha Thlahpa Pathaihpa Khazohpa a châ. Mawsi hnohta ypâ ta, Zawsua hnohta chhao ypâ hra ta, Davi zy, Daniel zy hnohta mopathaihpa nohta a ypâtuha Khazohpa ta atanoh Mission chakaona liata maniah ypâtuha a châ pyly.

Mara Awnanopa chhao 1957 kô Mara râh Krizyhna kô 50 tlohna liata Immanuel râh ta phuahpa a châpa hawhta Thlahpa Pathaihpa ypâna liahsa eima vaw pahno tawhta 1966 liata Mission eima vaw chakao pathaopa a châ. Mara awnanopa chhao Mission thlahpa eima topa pa-ia lymâpa ta riahpha kawpa ta Mission chakao lymâ suh vy!

Reipahmaoh awpa:

1. Mission a pahâh leipazy he Thlahpa Pathaihpa a to leipazy tahna a châ ma? reipahmaoh teh?
2. Khazohpa ypâna na hro liata nâ pahnonazie reih teh?

ZISU KRISTA TA AWNANOPA TUANA (2)

Chahrasala, Thlahpa Pathaihpâ nama chô ta a vaw tlô tita hmotaotheina nama hnei aw. Chatanachata Zerusalem liata zy, Zudia râh nata Samari râh khi to liata zy, kaoki taih chhaota ei bie pahnokheituhpazy nama châ aw tah ta (Ht. 1:8).

Zisu Krista ta Thlahpa Pathaihpâ hmâpa ta awnanopa a tuapa liata Mission thapasana ama hneipa hmotaotheina kyh nata awnanopa hnohta a pahlaolymâna kyh cha zahia liata eima chu khai haw. Atahma Geo-mission kyh rei awpa a châ. A thaipazy ta Pawliti (Politics) liata achuna kyh liata miakha peimawh kawpa cha alei nata râh hmia yzie kao lâ tawhta pawliti (Geo-politics) he a châ. Cha hawhta, Mission chakaona liata eima chakaona su nata râh, a sievawna zy pahnona (Geo-mission) he a peimawh kaw. Zisu ta maniah a chhopa cha Mission nama chakao awpa cha “Zerusalem tawhta pathaopa ta Zudia râh nata Samâri râh khihzy nata kaoki taih” tahpa ta maniah a chho. Chavâta khapa vâta ma Zerusalem tawhta pathao awpa a byuh?

Miakhana liata Zerusalem he, athaipazy ta, khizaw liahsôpa khih a châ ama tah. Zisu ta awnanopa a tua tita, anuapa cha khizaw kaoki taih thâtihpâ patlâsa awpa he a châ. Chavâta thâtihpâ bie khizaw zydua a tlâ patoh thei nawpa ta khizaw liahsôpa tawhta pathao awpa a byuhpa vâta Zerusalem khih tawhta pathao teh u a tahpa a châ. Mianona liata Zerusalem cha Zudia râh liata khihpipa a châ. Khihpi tagna yzie hmasiena supipa, ryureina supipa nata achhyna supipa tagna chhao a pahly. Zisu Krista ta a pi nota Bethlehem khih, Zudia râh liata khih nawh chaipa liata a pipa châ ta, Zisu cha achyh chaipa Bethlehe khih liata pih taraw ta khihpi chaipa Zerusalem tawhta mission chakao pathao awpa ta bie a pie ei. Zisu chhao cha Nâzari khih liata

laiseih ta Mission a chakaona cha Capania khihpi liata supipa ta a tao hra. Cha khihpi achhaipa ta mission chakaona cha Pawla mission chakaona liata a lâ pasia chai. Zisu pachupazy cha Zerusalem tawhta pathaopa ta Zudia rânzy Samari rânzy nata kaoki taih ta thâtihpha chho awpa cha, Pawla ta Zenitai nawhzy châta Kaisaria khih mission supi tahpa ta a pathao (Htp. 10:1). Syria rân châta Antiôka khihpi ama chhai (Htp. 11:19-30). Masidônia rân mission châta Philipi khih supi ta a tao (Htp. 16:6-16). Kawrini cha Akai rân mission supi a cha (Htp. 18:1). Ephisi khih cha Asia rân châta mission supipa a châ. Chavâta he khihpi supi taopa ta mission chakaona he anaopa ta a sie thei lymâ nawpa a châ.

Chavâta Mission chakaona liata khihpi tawhta supipa taopa ta chakao awpa he hmo peimawh kawpa a châ. Mara Awnanopa liata Saikao cha eima Missionary hmiatuapazy ta supipa châta ama vaw tly hawpa kha a châ. Chahrasala atanoh duahmo liata cha notla Mararâh liata Siaha he khihpi nata supipa, sawhkhâ ta a tobipa a vaw châ hawpa vâta awnanopa chakaona su châta rypaoh viana hawhta a vaw châ. Keimo MEC liata cha awnanopa supipa he Mararâh chhôn Lialai/Sabyhpi tahpazy ta y pita, Yangon/Hakha zy liata Office hnei mapi. Chavâta khihpi liata sawkhâ hmasiena ahly thei tyh mapi. Zisu daihti liata Krika mo culture hmasiena a hlypa ta Biehrai Thiepha he Krika reih ropa a châ. Rawma thatlôhna ahlypa ta Rawma khihpi tawhta Asia Minor rân zydua liata lâthlô pha ngasapa zy Pawla thâtihpha chhona rypaohna a vaw châ. Chavâta thâtihpha cha khihpi tawhta pathaopa ta chho awpa bie a pie ei.

Reipahmaoh awpazy:

1. Mara rân chhôn liata Mission chakaona supipa Headquarters eima hneipa a pha na tah ma? reipahmaoh teh?
2. Rakhine rân thotlâh mo liata thâtihpha chhopa hlâta Yangon nata Mandalay zy liata thâtihpha chho hri sila pha via vei ma, reipahmaoh teh.

Thlarâh
(September)
12

BIEHRAI THIEHPA LIATA MISSION PATIPAVYNA (Part One)

Cha khai tawhna chata Zisu ta biechhopa ta nata Khazohpa kihnarâh thâtih pahnosapa ta khiih laipazy nata khiih chyhpazy chahryh lymâ ta, a hnohta pahraw-hleinopazy cha y ei ta, chanô ahyzy tlyma thlahpa moleipazy nata chiehleipa a patlâhpazy nata Mari, Madali ama biepa, a chhôh tawhta ahripa pasari a papuapazy, Herawda sôh amohôtuha Kuza lapinô Zôana zy Susana zy nata ahropa hlupizy chhao ta ama châ, chazy chata ama hneina tawhta amo ama deichhy tyh (Lk. 8:1-3).

Khazohpa Mission a sie chatlie thei lyma nawpa ta Khazohpa ta a chyhsazy hmâpa nata a taozie zy hneipa ta a mission cha pati-pavyna a tao. Zisu daihti liata pachupazy he chino ta hmô theipa a cha: o nata lyu, sôh nata peh, lahpi nata sawzy siesaipa ta Zisu azipa sahlao nata o nata lyu, lapi nata saw zy nata raizy siesai hlei leipata Zisu azipazy sahlaozy ama cha. Kaohro ta reipa a châ khiah full time ta Khazohpa a chakaotuhpa nata ama hneina sôh ta Khazohpa a chakaopazy ama châ.

O nata lyu, lahpi nata saw, sôh nata piah zy siesaipa ta Zisu azipazy he Mongyuh reih "itinerant disciples" tah eita, Zisu hawhta chakaona a châ. Zisu ta reih ta, "Changiezy khaoh hnei ta, pavawzy bu hnei ta, chyhsa sawchapaw deikua a luh nyu nawpa hnei vei" (Lk. 9:58) a tah. Ano hawh tlai ta, a pachupazy cha aw ta, ato zydua ama siesai awpa bie a pie hra ei. Chavâta a pachupa hmiatuapa Pity, Zawhana, nata Zami zy cha ato siesaipa ta Zisu

ama zi (Lk. 5:11, 28). He hawh tlai ta tao awpa ta a pachupazy cha Zisu ta bie a pie ei (9:3; 22:35). Chyhsa sysari pano a tuana liata chhao he hawhta khapa hmah a phao lei awpata bie a pie ei (Lk. 10:4). He hawhta chakaona raihria he ama zibeipa liata ahlâkheina nata pachupazy mâ hneina ta pachâpa a cha (14:33). Zisu ta cha hawhpa a pachupazy cha nohto hro liata ama pachârôh leipa nata Khazohpa abôchha ta, Khazohpa ta a vaw pie awpa liata hnebei seih awpa a pachu hra (Lk. 12:23).

O nata lyu, lahpi nata sawnawh, sôh nata piah zy siesai hlei leipa ta Zisu a zituhpazy cha mongyuh reih ta "sedentary disciples" ama tah. Hawhrawh hropa ta eima rei khiah ama hneina ta Zisu a zipa tah theipa a cha. He hawhpa pachupazy he Zisu mission hlaotloh thei nawpa ta a peimawh kawpa ama châ. Pkn. ta Lk. 8:1-3 liata chanôzy kha ama o nata lyu siesai hlei leipa ei ta Zisu nata a pachupazy cha ama hneina ta nie ama pie lymâ. Ama hneina ta Zisu Krista azipazy y vei mawh sala cha Zisu mission hlao tloh thei ngyu aw vei. Ahneina hmâpa ta amopâ tlâh awpazy cha Kuza lapinô Zôana, Zisu nata pachupazy sponsor tuhpa (Lk. 8:3); chhiekheituhpa Zake, dyhchhiepazy baotuhpa nata Zisu nata a zituhpazy o patlôsatuha (Lk. 19:1-10); Arimathai khihpa Zawsi, Zisu ri pabuna awpa ta ano thlâ thiehpa a pietuhpa (Lk. 23:50-54). Chavâta he Zisu zituhpazy heta ato zydua sisaipa ta Zisu zi achhuah leipa eita, ama hneina nata ozy hmâpa ta Zisu mission chakaona liata ama pahlao.

Chavâta Zisu cha a mission chakaona a hlaotloh thei nawpata ano zina dâh kaono hnei ta, o nata lyu siesai ta chakaotuhpazy abyuhpazy cha o nata lyu siesai hlei leipa ta chakaotuhpa hneina sôhzy ta pati-pavyna a tao. MEC

awnanopazy chhao mebâh zydua ta Missionary tlyma, Pastor tlyma, evangelist tlyma full time cha Mission chakao a byuh hlei leipa ta, full time chakao awpa ta Khazohpa awna a pahno leipazy pita eima hneina sôh ta Khazohpa eima chakao hra awpa a châ.

Reipahmaoh awpa

1. MEC awnanopa liata Full time chakaotuhpazy Khazohpa tlokhuh ama chakao thei nawpa ta kheita eima deichhy aw, reipahmaoh teh?
2. Hneina sôh ta Khazohpa chakaopa he full time ta Khazohpa a chakaozy tlu ama peimawhzie reih teh?

Thlarâh
(September)
13

BIEHRAI THIEHPA LIATA MISSION PATIPAVYNA (Part Two)

Nâmo tlai ta eima ha maniah nama lahnazie awpa pahno tlôh ei chi ta, nama hry liata thathipa ta eima y leipa kha, ahy ku tawhtapa hmah ta asaipa ta nama viachhâ nie beih hra mapi, nama hry liata ahyhma rie eima cha pathei lei nawpata a chhò a zâ ta rietheipa nata hriapasapa ta hriana chôta tlao eima nie tyh. (2 Thy 3:7- 8)

Biehrai Thiehpa mission chakaona ta sasyh a mohôh thei awpa ta a pachu. Zisu ta tlâhleipa a patlâhsapazy he he hmo nata azaona a hnei tyh. Pakhona ta mochaopazy, pheisypazy, cha amo ta ta ama dua thei khao leipa vâta kudaopa ta ama y tyh. Chavâta Zisu ta a patlâhpa cha pôhpa tlâhna ama hnei awpa deita a chhuah vei. Pôhpa tlahna hnei ei sala kudaopa ta ama y khao lei nawpa ta a chhuahna chhao a hnei hra. Chavâta chyhsa mo papalih ta a vaw

sy laih eita Zisu hnohta ama vaw chhipa kha Zisu ta a patlâh khai tawhta ano hmohphaw la ta a sie haw tahpa eima pahno (Mk. 2:1-12). Zisu ta nga patu penawh cha ama peimawhpa nga pie leipa eita, ama peimawhpa ama hmô thei nawpa ta nga patuna dâh a pie ei (Lk. 5:1-4). Cha hawhta pheisypa achhyna o ochhi thaby liata kudaopa cha ama patlâh tita, pheisypa cha taka hmô awpa hnabeiseih ta, Pity deikua “Nâzari Zisu moh ta phei ta sie teh (Ht. 3:1-10). Chavâta Zisu nata a pachupazy ta patlâhna mission ama chakaona liata ama chhuah chaipa cha amo sasyh ta a dua thaina a châ.

Lyuchâ Pawla ta mission a chakaona liata ama mo tita sasyh baona ta mission chakaona rai a hria hra. Pawla cha Pharisai pakha a chapa hawhta a chakaona raihria châta kuzo thaina a hneipa a châ. Pharisai achuna (training) liata hmo miakha ama chu papa cha sasyh adua theina châta kuzôthaina (Skill) miakhakha achu awpa a châ. Cha liata Pawla cha “poh-o a sa thaina (Tent Making) a cha. Chavâta Kawrini khiih liata a mission cha poh-o a sathaipa Priskila nata Akuila zy nata akaopa ta ama hria (Htp. 18:1-11). Mohropazy liata baona hia leipa eita, amo ta tlai ta sôh tlua eita, mission ama chakao. Chavâta Pawla cha ano tlai ku ta hriapasapa ta mission a chakao lyma (Htp. 20:32-36; 2 Thes. 3:6-13).

Atanoh Rev. R.A Lorrain ta Mara awnanopa a vaw padua nota sasyh ta â mohôhpa (Self-supporting) awnanopa châ awpa â nua. Cha hawhta atanoh ECM nata MECzy kudao hrao leipa ta keimo nata keimo ta a duah pita, hriatuhpazy hlao pita, awnanopa cha eima padua lyma. Atanoh ta MEC awnanopa liata hriatuhpazy hlao he suhrawh sukha thyuna tawhta 60% hlâta hluih via leipa ta a piepa eima châ. Athaipazy reih eita, awnanopa sôh thyuna 60% hlâta hluih via leipa ta hriatuhpazy hlao a pie theipa cha awnanopa a padua liata sasyh ta a duah thei aw tahpa ama reih. Cha hawhta MEC chhao a râpasua lymâpa a châ. Atahma MEC cha sasyh

adua thei awpa dei châ leipa ta mohropazy taih ta byhnâ châ awpa ta a râpasua awpa a châ haw.

Atahma Mission eima chakaona liata deikua a chyhta pachâ via awpa a byuh. Mission kô 50 Zubili saipazihna tawhta eima mo tita, kô 50 chhôn Mission eima chakaona cha Kri pazysa ta moh rona rakha a vaw châ chy. Atahma tawhta a râpasua awpa cha Mission eima chakao peinawh sasyh ta ama dua thei nawpa he a peimawh haw. Chavâta kuzôthainazy, sasyh a mohôn thainazy, ahy pabua leipa ta amo nata amo ta ta ama dua thei nawpa Mission kô 100 tlohna plan hnei awpa a byuh.

Reipahmaoh awpazy:

1. MEC ta mohropazy taih ta byhnâ châ thei nawpa ta khapa e a tao aw, reipahmaoh teh?
2. Mission awnanopazy sasyh ama dua thei nawpa ta khei ta, khapazy MEC ta ataopa aw, reipahmaoh teh?

Thlarâh
(September)
14

**BIEHRAI THIEHPA LIATA MISSION
PATIPAVYNA MIATHÔHNA (Part Three)**

Alypazy cha a lykhei u la, achapazy cha chakhei teh u (Rm. 12:15).

Biehrai Thiehpa ta mission chakaona liata chakaolâh (partner) hnei awpa ta a pachu. Hrialâhpa hnei chhapa cha pakha nata pakha alyna nata rairuna a pahnokhei awpa a cha. Pity cha nga hluhpi a patupa vâta "balyh hropa liata ama pyheih a ypazy cha âmo a bao awpa ta ama ku ta a kei ei ta" (Lk. 5:7). Pity cha hro chhôn ta a hmô beih leipa nga cha baly miano tlai ta a patu.

Chavâta byhnâ a topa cha a pyheih a ypazy chhao aw ta byhnâ a topa a lykhei hra awpa ta a aw ei. Mietaku vaituhpa ta aleipa mietaku a hmô heih nota, chanô pakha ta taka aleipa a hmôheih nota, nata paw ta a sawchapaw aleipa o â vaw di heih nota ama viasazy nata mohropazy alykhei awpa ta awpakhy ei ta, amâ lykheipa Zisu pachuna liata eima hmô (Lk. 15:1-24). Chavâta alyna noh liata alykheituhpa viasazy hnei awpa â byuh.

Alyna noh liata maniah alykhei awpa eima peimawhpa hawhta rairuna nata mâchhiesana daihti liata chhao thlapalôtuh awpa eima byuh hra. Awnanopa hmiatuapazy daihti liata Zudia râh liata chakâhna vâta rairuna a tyhpa unawhzy bao awpa ta Antioka tawhta awnanopazy ta baona ama tao (Hpt. 11:27-29). Antioka awnanopazy cha thlahpa chhithana ta Zerusalem liata a ypa awnanopazy niedo rairuna pathlâkhei awpa ta ama sôhzy pahmaoh eita, Antioka tawhta Zerusalem lâta a vaw siepa Pawla nata Banaba liata ama vaw paphao tahpa eima pahno. Zerusalem liata a ypa amâ ngiapâlâhpa awnanopazy niedo rairu ama tyhpa liata thlahpalôh awpa he awnanopa taovyuh a châ tahpa pahnopa ta achâkheina sôh ama vaw paphaopa a châ.

He hawhta Awnanopa mebâhzy rairuna ma tyhna daihti liata riapha â chakaihpa Mesidona awnanopa kyh eima hmô. Mesidona awnanopa cha rairuna hluhpi ama tyhpa hry tlai ta, riapha kawpa ta awnanopa riethei viapazy bao nawpa ta ama sôhzy ama pahmaoh (2 Kaw. 8:1-6). Cha Mesidona awnanopa riaphana cha amopâ awpa ta Pawla chhao ta Zerusalem liata a ypa awnanopa sahlaozy rairu atyhpazy cha bao thei nawpa ta Kawrini awnanopa cha a pasyu hra ei (2 Kaw. 8:7-15). Kawrini awnanopa he Mecidona awnanopazy hlâta a hneirôh viapa châ eita, piena kyh liata tovyuh rônah viapa ama hneipa chhao a pamosa pâ hra ei. Khazohpa ngiachhiena thâtihpa cha Zu chyhsazy yna Zerusalem tawhta Zenitaihzy yna Mesidona zy, Antioka khih zy, Kawrini khih zy lâta phuahpa a châpa kha Zenitaih zy tawhta Zu

chyhsazy lâta rairu pathlâna baona ama pie heihpa cha Pawla biereipa "... amo liata abâh hâ hra ei ta, Zenitaihzy ta ama thlahpa lâ ama hlykhei tlôh khiahta cha khizaw lâta a byuhpa hmozy ama deichhy hra awpa tlai a châ (Raw. 15:27)" he liata a paki. Baona sôh he awnanopa/mission chakaona liata a byuhpa a châ. Chavâta Mission raihria liata rairuna potlana tlyma, chariah adyuhna vâta tlyma, mei, ti nata thlih zy tawhta rairu chichhina tlyma maniah a chakhei awpa viasa awnanopa hnei awpa a châ.

Atahma MEC awnanopa nata mission chakaona liata alyna tlyma, rairuna tlyma eima tyh tita maniah pahnokheituh awpa viasa awnanopazy hnei awpa a byuh. Pakhona ta Lutheran awnanopazy he a châ via pachai. Awnanopa a pohkhana pyzy (WCC, WARC, LWF, CCA, MCC) liata eima ypa chhao he kyh liata a phahnai. MEC awnanopa chhôh liata alyna nata rairuna eima tyhpa a pahnokhei awpa he Biehrai pachuna dâh a châ.

Reipahmao awpa:

1. Local awnanopa to ta relief fund hnei a pha/pha lei reipahmaoh teh?
2. Mohropazy chhie noh liata bao thei nawpa ta kheita eima tao aw?

Thlaráh
(September)
15

MISSION CHAKAONA CHA THOKÔ LO TA LO AWPA A CHÂ

Kei ta lo na ta, Apôlôsa ta ti bao ta, chahrasala Khazohpa ta a palaiseihsa. Chatanachata a palaisatuhpa Khazohpa dei leipa ta ti a baotuhpa chhao cha khapa hmah châ hra vei. A lotuhpa nata ti a baotuhpa cha miakha ama châ; chahrasala amo hriapasazie lymâ hawhta amo lymâ ama hmô raihri aw. Keimo cha Khazohpa rai a hrialâhpazy châ tloh pi ta, namo Khazohpa lyu châ ei chi ta, Khazohpa o sapa cha châ hra ei chi ta (1 Kaw. 3:6-9).

Ato zydua he achhuahna a hnei khaipa a châpa hawhta thokô lo chhana he a y hra. Cha cha thei hluhpi pathei awpa he a châ. Thei pathei tloh leipa khiah thokô cha eima lo chhana y vei. Nohkha cha Zisu nata a pachupazy cha Betheni khieh tawhta vaw sie ei ta theiku kô miakha ama hmô. Nie leipa ta ama vaw siepa vâta Zisu ta a pachupazy cha theiku thei lao awpa a tuah ei. Chahrasala, theiku kô cha a hna deikua phangasa ta a thei a pathei leipa vâta Zisu ta a hiehâh kaw ta theiku kô cha chhiesa ta theiku kô a thi haw tahpa eima pahno (Mk. 11:12-14; 20-22). Chavâta Zisu Krista ta thei hluhpi nama pathei thei nawpa ta ei cha tlyh ei a tah (Zhn. 15:16).

Lyuchâ Pawla ta Mission chakaona cha lyu taopa hawhta a rei. Lyu cha a zipa y aw ta, cha hawhta Mission cha a zi y hra aw ta, cha cha Khazohpa a châ a tah. Cha lyu liata chicheipazy cha mohôtuhpazy y aw ei ta, amozy cha Missionary zy ama châ. Lyu taona kyh liata raihriatuhpa ta chicheizy lo awpa kyhzy, khasia ta ti bao awpa kyhzy cha missionary zy raihria châ ta, a palaiseihsatuhpa deikua Khazohpa a châ. Chavâta thokô lopa mohôhna rai a hriapazy cha thothei hluhpi a pathei thei nawpa ta

tha ta khasia mohôh awpa a châ. Thei patheina kyh liata Zisu ta a reipa cha, “Kei kre zôh cha ei cha, namo a chiahzy nama cha. ahyrai keima liata y thlâhâ ta, kei chhao ano liata y thlâhâna cha, cha cha a hluhpi a pathei tyh. Keima leipa ta khapa hmah tao thei tloh ei chi va (Zhn. 15:5)” a tah. Chavâta Khazohpa bie chi eima pabupa/lopa cha Khazohpa bie lilaw ta ti bao lymâ awpa a byuh. Athaipazy ta Raipie rônahpa liata pachupa ta taona kyh liata eima pachu awpa cha Khazohpa bie châ ta cha cha Athaona châbu tawhta Biephuah châbu taih he pachu awpa a châ ama tah. Mission chakaona kyh liata Khazohpa bie hluhpi pachu awpa he thei phapa nata thei hluhpi ama pathei nawpa a châ.

Thlahpa Pathaihpa raihria chhao anuapa cha thei hluhpi pathei awpa he a châ (Kal. 5:22-23). Thothei kô mâ hneina cha a thei liata ngiapa a châ tyh. Cha hawhta a thei liata mission chakaona hlaotlohna he ngia awpa a châ hra. Zisu pachuna liata theiku kô a pathei leipa vâta ahyhma a thei nie khao lei awpa bie a pie. Kre chiah chhao a thei a pathei vei khiah chhawh ta mei liata thy awpa ta a reih hra. Chavâta MEC chhao Mission lyu mia charu (Khumu, Lemaro, Hletu, Asho, Maru, Myo) eima hnei. Cha liata thothei kô eima lopa awnanopa sahlaozy cha thei a patheipa awnanopa ama cha thei nawpa ta Khazohpa bie ta ti bao tiama awpa a châ. Thlahpa theilâ tlyma, kyhpachâna theilâ tlyma ama pathei nawpa ta Mission sadô zipa Khazohpa hnohta thlachhana chôta hriapasapa ta tiama papua suh vy!

Reipahmaoh awpa:

1. MEC Mission chakaona liata thei phapa a pathei via thei nawpa ta khapa eima tao via aw? reipahmaoh teh.
2. Nama zaw MEC mission chakaona liata khataih lyuhmah lia na y kho? Thlachhana lyuhmah lia ma/ Mission tuana lyuhmah lia ma/pôhpa ta siepa ta full time chakao lyuhmah lia ma? etc.. reipahmaoh teh.

Thlarâh
(September)
16

MISSION CHAKAONA CHA SÂTÂ CHARIAHPA ADYUHNA RAIHRIA A CHÂ

Ahripa reipasaonazy cha nama dyuh thei nawpata Khazohpa adyuna chhaichhi pakipa ta atobie teh u. eima piapazy he sapa nata thisai châ tlôh lei kha ei ta, abeinazy nata bieheinazy nata he zohna chô liata khizaw ryureituhpazy nata avâ suzy liata thlahpa moleipa sahlao a ypazy tloa ama châ. Chavâta noh pha leipa liana chata nama dyuh thei nawpa nata nama tao khai tawh chhaota nama dua thei nawpa ta Khazohpa adyuhna chhaichhi pakipa cha la teh u (Eph. 6:11-13).

Mission chakaona cha Sâtâ chariah adyuh ngâpa hawhta eima châ. Chavâta sapa nata thisai ta a hropa châ leipa ei ta, Khazohpa ta adyuhna dâh a taopa hawhta Khazohpa adyuhna chhaichhi pakipa atobipa ta deita a dyuh thei awpa a châ. Atahma hlata Covid-19 hri ta a kia lei nawpata PPE chhaichhi pakipa ama kyh tyhpa hawhta Khazohpa Adyuhna chhaichhi pakipa he a byuh. PPE Set cha chhaichhi mia pangawh a chhôh liata a ypa hawhta Khazohpa chhaichhi pakipa chhao chhaichhi mia charu a hnei hra.

Miakhana cha biehmeiseihpa chaisaih a châ. Chaisaih he eima tha patlôna a châ. Ivy cha Sâtâ ta a vaw reipasao tita, Khazohpa bie hmeiseihpa liata a dua leipa ta “chhie nata pha pahnona thothei he a hria chhao hria khu vy Khazohpa ta a tah” tahpa a reipa na ta Sâtâ ta dôvei theipa a châ tahpa thlai a pahnopa vâta Ivy cha ama vaw dô hawpa kha a châ.

Mianona cha siana chachôhna vyhpha. Chachôhna vyhpha cha ama by pakhana ta eima chahrana a châ. He heta hro thlalôhna a pie. Chhaichhi miathôna cha adyuhna thâtihpha pheiky a châ. Khizaw liata adyuhna he chahraochatôhpa a dyuhna

(violence) nata chahraochatôh leipa ta adyuhna (Non-violence) tahpa ta miano a y. Khazohpa adyuhna dâh deikua adyuhna thâtihpha a châpa vâta chahraochatôh leipa ta a dyuhna a châ. Miapalihna cha ngiapâna vyhphao a châ. Vyhphao cha châtai a ia theipazy pachhaina a châ. Pity cha ti chô liata Zisu lâ mopa ta ngiapâna ta a sie nga nota tily riachi ta Zisu lâ a vaw mo khao leipa vâta ti chhôn lâ a tla tahpa eima pahno. Chavâta ngiapâna he maniah a thie thei awpa chatai a padiah theipa a châ. Miapangawhna cha pachhana lakhu a châ. Zisu Krista pachha sawzy châ pita Khazohpa ku tawhta ahyhma maniah chhu thei vei. Eima hrona pabohsana a châ. Miacharuna cha Khazohpa bie thlahpa zaozi a châ. A chô liata palâsa chiehpa zydua cha a pakhâna chhaichhi sai a châ. Khazohpa bie thlahpa zaozi deikua eima chariah thiena chhaichhi a châ. Khazohpa bie pahno kawh awpa, hnei hlul awpa nata hmâ hlul awpa he charia eima pahniena a châ.

Chavâta he Khazohpa adyuhna chhaichhi leipa ta missionary thai leipa ta pastor thai hra vei. Chhaichhi hnei leipa ta chariah a dyuhpa hawh deita a châ aw. He adyuhna chhaichhi pakipa atobipa ta Mission eima chakao khiah Elaiza ta Baal hrosopazy a pahniapa hawhta Mission field liata Sâtâ biehneina zy eima dyuh thei hra aw.

Reipahmaoh awpazy:

1. Khazohpa adyuhna chhaichhizy paziah la, a peimawhnazy reih hra teh?
2. Na hro liata Khazohpa adyuhna chhaichhi na papeimawhsa chaipa reih teh?

Thlarâh
(September)
17

MISSION CHAKAONA CHA PATLÂHNA RAIHRIA A CHÂ

Zisu ta pahrawhleino zy cha awpakhy ta ahripa zydua chô liata hmotaotheina nata biehneina nata pasapazy patlâh theina pie ta, Khazohpa khihnarâh bie chho awpa nata a tlâh leipazy patlâh awpa ta tuah ta. Chatanachata sie haw ei ta, khih cha chahryh lymâ ei ta, Thâtihpha chhopa ta chyhsa patlâh lymâ hra ei ta (Lk. 9:1-2; 9:6).

Zisu Krista ta a pachupa mo pahrawhleino zy cha a tua nota biechhona nata patlâhna rai hria pabaoh awpa bie a pie ei. Chahawhta Zisu pachupa mo pahrawhleinozy cha khihzy chahryh ei ta, a tlâh leipazy ama patlâh tahpa eima hmô. Patlâhna raihria he Mission chakaona liata chhaichhi rônah kawpa miakha a châ. Ahripa ta a patu hawpa tlyma, pôhpa pasana a hneipa tlyma, mochao tlyma, nahpâpa tlyma, pheisypa tlyma nata aphawhpazy tlyma ama patlâh khai na ta Zisu zituhpa lâta ama vaw lie lymâpa eima hmô. Chanô thokha ahripa ta a patupa nata chiehleipazy: Mari zy Madali zy Kuza lapinô Zôana zy nata Susana zy cha patlâhpa ama châ tawhta Zisu chakaona liata deichhytuhpa lâta ama vaw châ haw (Lk. 8:1-3).

Awnanopa hmiatuapazy daihti liata patlâhna raihria he ama vaw hmah pazao lymâ. Thlahpa Pathaihpa tlô noh tawhta atlâh leipazy patlâhna ta hmonoâhpa hluphi ama tao. Pheisypa Zerusalem achhyna o chhikao liata ku dao tyh ta, Pity nata Zawhana zy ta cha chyhsa cha ama patlâhsa tahpa eima hmô (Ht. 3:1-10). Pity nata Zawhana cha Zerusalem khih nata a chheipâh

zy liata a ypa khihzy tawhta a vypa a tlâh leipazy cha patlâh ei ta, chyhsa hluhpi cha awnanopa lâta hluhpi ama baichha lymâ (Ht. 5:16; 8:7; 9:34). Pawla chhaota thatihpha a chhona liata patlâhna rai he Zisu rai pazaopa hawhta patlâhna a tao lymâ (Ht. 10:38; 28:9).

Rev. R.A. Lorrain chhao Mara râh liata Mission chakaona hlao a tloh thei nawpa ta Livingstone College liata thohna achuna a hnei tua chai. Mararâh liata a vaw tlô tawhta Marasawzy cha ahripa biehneina liata ama y chypa vâta tlâh leipa maih vao nata awh zy thiepa ta atheihna ama hlâ tyh. Sahro awhvaw a hnei leipazy tlâhna hmô awpa a ru ngâsâ. Chavâta Lorrain cha thohna piepa ta atlâh leipazy ama tlâh lymâ. Chavâta Zisu a ngiapâ awpa ta moh ama roh lymâ hra.

Atanoh cha keimo awnanopazy cha Zisu Krista raihria a châpa patlâhna raihria he eima hriapazao lymâ awpa a châ. Awnano hmiatuapazy chhao Zisu raihria patlâhna rai cha ama pazao lymapa hawhta Lorrain chhao patlâhna raihria he Mission chakaona liata a vaw phahnaikhei ngâsâ. Cha hawhta ECM chhao patlâhna raihria cha pazao lymâ ei ta, Centenary Hospital ama padua hra. Keimo MEC chhao patlâhna raihria eima hnei hra awpa a byuh haw. MEC ta Mission chakaona liata Clinic (Thohna o chyhpa) tlyma, Thohna o laipa (Hospital) padua awpa a byuh.

Reipahmaoh awpa:

1. Patlâhna raihria he Mission chakaona miakha a châ tahpa nâ pyh ma, reipahmaoh teh?
2. MEC ta Hospital tlyma, Clinic tlyma padua ba hra sila a pha na tah ma, reipahmaoh teh?

Thlarâh
(September)
18

MISSION CHAKAONA CHA HMASIENA RAIHRIA A CHÂ

Chyhsa to hnohta hmasie nawpa ta pie chyupa a châ. ... Chahrasala cha zydua cha Thlahpa pakha châ ta chyhsa to hnohta a khohzi lymâ hawhta rai chyupa ta a hria tyh (1 Kaw. 12:7,11).

Khazohpa ta thlahpa piepa ta a awnanopazy cha hmasiena a tao tyh. Khazohpa ta awnanopa hmasiena cha ano pôhpa ta hria leipa ta a chyhsa hnohta thlahpa hmosaipa piepa ta a hria tyh. Chavâta awnanopa hmasiena anuapa ta Thlapa Pathaihpa ta rai a hria tyh (1 Kaw. 12:7). Mara Biehraia liata, “Chyhsa to hmasie nawpa ta thlahpa pie chyupa a châ” tahpa ta a roh. Mongyuh reih ta “hmasiena” tahpa he *edification* tahpa ta palie ta, cha cha Mara reih ta “hrozie nata palôrupa hmasiena” kyh châ, palôh hawhna a châ. Awnanopa hmasiena he hmô theipa pôhpa hmasiena a châpa achhyna o zy, quarter zy, achhyna o chhôn chhaichhizy hmasiena hlâta ngiapâtuhpazy palôhrupa palôh hawhna nata palôh kawhna zy nata hrozie hmasiena zy a châ via hri. Chavâta Kawrini awnanopa liata cha apalainazy, aeichhianazy, apheinazy tahpa ta moleina hmo hluhpi a y. Cha liata thlahpa hmosai piepa a topazy cha keima eih a pha via tahpa ta a palaina zy nata aeichhiana zy atlôkhei tyh. Chavâta thlahpa hmosai to tlôh khiahta cha awnanopa hmasiena palôh hawhna a hnei awpa a châ. Thlahpa hmosaipa zydua hlâta kyhpachâna he a vaw peimawh chaipa a châ (1 Kaw. 13:1-4). Chavâta awnanopa cha “hmasiena lâta” tahpa hlâta “pitlohna lâta” chhitha awpa a châ.

Ngiapâtuha to hnohta Khazohpa thlahpa ama pie chy. Cha Thlahpa Pathaihpa hmosai piepa cha eima hrona pabohsana chhaichhi chhao a châ. Atanoh duahmo tawhta reipa a châ khiah, thokha châta Pastor châ theina hmosaipazy, pachutuhpa châ theina hmosaipazy, ryureituhpa châ theina hmosaipazy, dawhty châ theina hmosaipazy, etc... tahpa zy ta pavaosapa eima châ. Cha hmosai piepa eima hro liata a pamoh thlahpa cha thaopapua ta palaiseihsa awpa he miakhana liata chyhsa to ta eima peimawh. Hmosai piepa cha hmâtlâh a châna taih palaiseihsa awpa a châ. Chyhsa sohpa zy ta ama reipa cha “Khazohpa hmosai pavaosapa hmâ hmaleipa ta a hrona thlâkhaoh a ngiapa 90% ama châ” ama tah tyh.

Khazohpa khihna râh paduana nata hmasiena châta Khazohpa ta chyhsa to hnohta piepa cha awnanopa hmasiena châta hmâ chy awpa a châ. Eima topa thlahpa cha Awnanopa nata Mission eima chakaona lyuhmah a châ. Pakhona ta Pachutuhpa ta Khazohpa khihnarâh cha pachuna raihria tawhta padua aw ta, Pastor ta Khazohpa khihnarâh cha pastor raihria tawhta a padua aw. Cha hawhta Dawhtypa ta patlâhna raihria aw ta, ahneirôhpa ta hneina ta mission a chakao hra aw. Cha hawhta chyhsa to ama topa hmosai piepa hmâpa ta Mission chakaona cha ama hria chy awpa a châ.

Reipahmaoh awpa:

1. Khazohpa ta thlahpa hmosai piepa na pahno ma, reipahmaoh teh?
2. Atanoh Mission chakaona lyuhmah liata kheh hawpa kao tawhta nama zaw nâ hlao thei hra, chhopsia teh?

Thlarâh
(September)
19

MISSION CHAKAONA NATA CHHEIPÂH PABOHSANA

ABeipa ta kha cha chhitha aw ta, su chawhkaraipa liata chhao lôhra cha patlô aw ta, na ruzy chhao tha a patlô hra aw; sadô ti ta pasapa hawhta nata ti hnawh akua beihleipa hawhta na châ hâ aw. Nâ tawhta a pua awpazy chata, su parahpa, pathaiparohpa zy cha taopathi heih aw ei ta, chhâ hluhpi lôbôzy ta na paryh heih aw; nâ cha a raopa ataopathituhpa, chyhsa pahrana awpa ta lâpizy ataopathituhpa, a cha tah aw ei (Is. 58:11-12).

Khazohpa ta hmotaopa cha taopathi a byuh khao lei awpa ta tao leipa ta, taopazao lymâ abyuhpa ta a tao. Cha taopazao lymâna cha thlahpa hmâpa ta a chyhsazy liata a pahnieh. Pakhona ta thua cha alei ry liata sôh ta, chyhsazy ta cha thua (Raw material) cha chyhsa châta phahnai nawpa ta abyuhna lâta palie awpa a châ. Ti nata tlâhzy cha tao ta chyhsa hro pabohsa nawpa ta chyhsazy tao awpa chyhsa hnohta a pahnieh. Khazohpa khizaw atao tua nota yzie ahnei leipa hawhta a y chy (At. 1:1-2). Cha yzie ahnei mâh leipa khizaw cha Thlahpa ta yzie a hnei thei nawpa ta khainazy, chhô nata zâzy, tilaipi nata tlâhzy a tao pazao lymâ (At.1:3-25).

Chyhsazy moleina vâta khizaw yzie hnei kawpa ta ataopa cha arao lei nawpa ta chyhsapa cha mohôh awpa ta bie a pie heih (At. 1:28). Chavâta hmohrohneipa zy nata thokô râh kô zy mohôh awpa he keimo maophaona a vaw châ haw. Chhaohlei nata thokô râhkôzy, hmohroh hneipazy he Khazohpa yzie hnei kawpa ta atao hawpa vâta chyhsa hrona châta azaokhina a hnei khaiya a châ. Ti

yleipa ta chyhsa hro thei vei. Thokôpazy he a tho nata a theizy a hnazy deita hmâ awpa châ leipa ta thohna tawhta a puapa Oxygen thlih pathaihpa he chyhsa hrona châta peimawhpa a châ. Hmohrohneipazy he chyhsapazy châta raihriatuhpa sai ama châ. Ti a pathaihsatuhpazy, chichei a papohsa awpa nata a paphasa awpazy, thlih pathaihpa maniah a pie awpazy tahpa ta rai ama hria lymâ. Thokô râhkôzy ta khihchâh phapa ama tao. Râh he mei kê ta, meikhuzy ahluk khiah nohsapa vâta a palopa pakhâna (ozone) parao ta khizaw he tha ta a palosa. Chavâta chheipâh Khazohpa kuzô pabohsa awpa a byuh.

Chyhsa moleina piehpiena vâta atanoh hmotaopazy he a rôhpa ta a y (Raw. 8:20). He arao haipa chheipâh he taopathi awpa ta atanoh ngiapâtuhpazy maophaona a châ. Eima ti nata tlâh liata thokô râhkôzy nata chavahzy alôzy, pabohsa awpa a châ. Eima râh liata ti hnawhzy a kua lei nawpa ta thokôzy lo chadô awpa a byuh. Chavahzy a pathaih thei nawpa ta palasticzy, khaw sathawzy, râhvâ chypazy, thua chypazy thy chakhy leipa ta thyna su rao awpa a byuh. Râhzy he mei pakâ khao lei awpa ta a pasie khao leipa ta sukha liata lyuzy hnei pathao awpa a byuh. Chavah liata a pahrâpa hmohroh hneipazy aboh thei nawpa ta châmailhzy hmâ khao lei awpa a pha. Eima râh arao haipa he taopathi ta pahrâna khohchhahpa ta tao awpa he Mission chakaona miakha a châ.

Reipahmaoh awpazy:

1. Chheipâh pabohsana he Mission raihria miakha sakha a châ tahpa na pyh ma, reipahmaoh teh?
2. Chheipâh pabohsana prokrâ kheh ta eima local chyuh ta eima tao thei aw reipahmaoh teh?

Thlarâh
(September)
20

CHATLIE CHAKOH KAWPA TA CHAKAO BYUHPA MISSION

Zisu ta ama hnohta, “Na tuatuhpa khohpa tao’pa nata a raihria paloh awpa he ei pati a châ. Namo ta, ‘Sah hria daihti thla palih â byuh’ tah vei ei chi ma? Nathlieh teh u, ei cha chho ei hi, sai u la, lyuzy moh teh u, atahma hmahta hria awpa a maih haw (Zhn. 4:34-35).

Zisu Krista ta Mission chakaona cha pahawhpasâh thai lei awpa a châzie he sah hria peimawhzie nata pakhopa ta a rei. Sahriana daihti he pahawhpasâh thaipa a châ leizie he lyutaotuhpazy ta ama pahno chaipa a châ. Nôpawzy ta reih tyh ei ta, eima mo hmô hmahta pathla sila, a hua hmâ lei awpa daihti” a châ ama tah. Rei khohna cha eima pôhpa liata pachiahpazy he peimawh kaw saipa châ ta, mokhao chhochhi he a y leipa khiah mochao he peimawh via pachai aw. Cha pôhpa liata a peimawh kawpa mohmô hmâh ta pathla pathlei hawpa châ sala, a hua hmâ leipa ta chakao awpa sahria peimawhzie kha ama pakhona a châ. Cha hawhta Mission chakaona he a peimawhpa a châ. Athaipazy ta ama rei tyhpa cha a tlâhpipa ta, “khizaw liata second miakha liata chyhsa pakha pih ta, chyhsa pakha ama thi lymâ” ama tah. Chavâta nohkha (dawh 24) chhoh ta chyhsa mo 86400 rachhoh ama thi nga tah theip a châ. Chavâta nohkha mission chakaona eima hawhpa vâta mo 86400 rachhoh Khazohpa kyhpachâna thâtihpha thei hmâ leipa ta meitipo lâ ama sie ngâ tah theipa a châ.

Isarel râh liata abeipa Ahaba daihti liata kô thoh nata khophie niedo chakâhna a yna daihti liata Elaiza he hrosohpa a châ. Isarel râh Baal achhyna ataotuhpa Ahaba abeipa hnohta Khazohpa paloh châ leina a reituhpa Elaiza a châ. Chiari chavah liata abeipa Ahaba riahchi ta a nyu ta, avâ a sua khao leipa vâta chavah liata ti a kuakhaipa vâta niedo nata ti zy a y khao leipa

vâta yna su a pasie awpa a châ. Khazohpa ta Elaiza cha Zerapha khieh lâta nohkha tlôh ha awpa ta sie awpa bie a pie. Chiari chavah tawhta Zerapha khieh cha nohkha ta tlô thei rimâ awpa châ taraw vei. Khazohpa sie cheingei awpa a hnaw. Hawsâh khao leipa ta Zerapha khieh tlô a byuhna chhâpa cha, cha noh lia tlai ta a tlô vei khiah, Zerapha khieh liata a pahrâpa Nôhmei nata a sawchapawpa cha ama hneipa viahdie nata sathaw cha, cha zâ cheingei ta a pachha bâ awpa ama châ. Chavâta hawsâh khao leipa ta Elaiza cha siepara ta zâlâ a tlô nata Zerapha chanô o liata tlô ta, cha chanô nata a sawchapaw châta chhao Khazohpa ta ama beihpari liata viahdie nata sathaw cha chhâ khao leipa kôthôh nata khophie chhôn nie a pie ei. Cha lia tlai cha Khazohpa chyhsa Elaiza hro cha pabohsapa châ ta, chatawhta Kamel tlâh liata Baal hrosohpa mo 450 hrona cha Elaiza ta a vaw pahlei thei haw.

Atanoh MEC awnanopa chhao Mission a chakao haipa châ pita, noh chareih update kawpa ta mission chakao awpa eima peimawh kaw. Atahma MEC Mission chakaona liata rairuna eima tyh hawpa miakha cha local mission sôhzy mission chakaotuhpa zy ku liata a tlô para thei khao leipa he a châ. Mission sôh cha local awnanopa mebâhzy ta tiama kawpata vaw pahmaoh tyh taraw ei ta, sôh deikua Office patlô chatlie lei kaw tyh, Mission chakaona he chalih thaipa a châ leipa hawhta pahawhpasah thaipa châ hra vei. Office tawhta Mission Office lâta mission soh he chatlie kawpa ta patlôtyh awpa chhao a peimawh. Awnanopa raihria thokha a chalih hra sala, Mission chakaona dei cha a chalih thai awpa châ vei. Mission chakaona pahawpasahsapa vâta thlahpa leidiapa hluhpi eima pahlei thei. Chavâta Mission chakaona he hmiapasâh sila, chakao tiama chyu suh vy.

Reipahmaoh awpa:

1. Mission chakaona liata maniah a pahawpasahsapa khapazy ma a châ paziah teh?
2. Mission chakaona he pahawhpasah leipa ta kheita eima tiama thei via aw, reipahmaoh teh?

Thlaráh
(September)
21

MISSION CHAKAONA HE BIEPIE RÔNAHPA A CHÂ

Zisu ta a hnohta Abeipa na Khazohpa cha na pathipalôh tlokhuh ta, na thlahmihpa tlokhuh ta nata na palôhru tlokhuh ta kyh na pachâ awpa a châ tahpa hi. Biepie rônahpa nata hmiatua chaipa a châ. A mianona a lyupa cha he he a châ. Nama kyh na pachâpa hawhta na vaihzy chhao kyh na pachâ awpa a châ tahpa hi (Mt. 22:37-39).

Mission chakaona cha biepiepa a châpa vâta ei awpa châ leipa ta zi cheingei awpa a châ. Biepiepa cha zi cheingei awpa tahna châ ta, a dieh thaipa chi châ vei. Ahawna châ hra vei, pasyuna châ hra vei. Khazohpa biepiepa a châ. Chyhsa biepiepa cha biepietuhpa a kho leipazy ta adyuhpa ta ama ei pathlei thei. Mission chakaona deikua Khazohpa biepiepa a châpa vâta eima chakao vei khiah peina a hneipa a châ. Chavâta Pawla ta, Thâtihpa chhopa he a palai awpa hnei vana. Tao lei thei leipa ta ei chôta a pahnieh tloh ta, Thâtihpa ei chho vei khihtala ei hu a po aw, a tahpa kha a châ (1 Kaw. 9:16).

Mission chakaona cha biepie rônahpa a châ. Biepiepa hluhpi hry liata Mission chakaona he biepie rônahpa a châ, achhâpa cha kyhpachâna raihria a châ. Kyhpachâna tahpa cha sasyh a piepasaina a châ. Zisu Krista hro liata kyhpachâna hro â lâpasia chai. Zisu kyhpachâna cha Pawla ta, “Moleipa eima châ no tlai ta keimo vyuhpa ta a thina he a châ a tah (Raw. 5:17). Chyhsa rônahpa nata hmotao theipa, a hneirôhpazy châta a thi ngâhpazy hluhpi ama y thei aw. Moleipa, a hohipa, parupangapa chyhsa châta a hrona a pie khohpa deikua y thei aw va ei. Zisu Krista deikua ano hrona papeisa leipa ta moleipazy maniah a pachha. Sasyh a pakypa ta chakaona he kyhpachâna a châ.

Kyhpachâna he Khazohpa kyhpachâna tawhta a vupa a châ. Khazohpa kyhpachâna a pahnopazy ta ama vaihzy lâta ama palâsa awpa a châ. Khazohpa kyhpachâna cha mission chakaona raihria liata eima palâsa. MEC awnanopa chhao cha Thâtihpha eima vaw thei tawhta Mission chakaona eima vaw chupa a châ. Mission eima chakaopa chhaohe eima hneipa vâta chakaopa cha mapi. Kyhpachâna raihria a châpa vâta eima hnei leina chôta eima chakao. Kyhpachâna raihria he MEC Mission chakaona liata â lâpasia kaw. Mission chakaona budget ta Awnanopa chakaona liata hmâpa budget hlâta â sâh via tyh. Chavâta MEC cha sasyh ta a pakypa ta mission a chakaopa awnanopa eima châ. He hawhta Mission chakaona thlahpa eima topa he pahlei leipa ta chhy lymâ suh vy.

Reipahmaoh awpa:

1. Khapa vâta ma Mission chakaona he biepie rônahpa a cha, chhopsia teh?
2. Mission thapasana thlahpa eima hnei via rili nawpa ta khapa eima tao aw, reihpahmaoh teh?

Thlaráh
(September)
22

BIEHRAI PAROHPA LIATA THLAHPA PATHAIHPA RAIHRIA

Chôlâ tawhta Thlahpa cha eima chô liata leithlupa ta y ta, râhpathopa cha alei pha ngaitapa su ta a lie ta, alei pha ngaitapa su cha râhmahpa reipa ta a châ aw. Cha tina chata pachiana siapa cha râhpathopa liana chata pahrâ aw ta, siana cha alei pha ngaitapa su liana chata a y aw. Siana raihria theilâpa cha adyhna châ aw ta, siana liata a puapa cha chhazaw ta thlalôh kawpa ta yna nata ngâna kyh ta yna a châ aw (Is. 32:15-17).

Biehrai Parohpa liata Thlahpa Pathaihpa raihria cha Khazohpa tawhta byhnâ tona kyh châ ta, cha byhnâzy cha siana, adona nata adyhna kyhzy liata â phualuah. Chavâta Thlahpa a topazy cha siana chôta ryurei thaina byhnâ ama to. Siana ta ryu a reipa chhôhkha tlyma, khitlâh tlyma nata râh tlyma cha adyaryhna a y tyh. Chavâta Thlahpa Pathaihpa a topazy chata a dyryhna chhôkha, khitlâh nata râh ama padua tyh. Cha byhnâzy chhao cha Thlahpa lapa a châ tita, lâpâpa a châ tyh hra (Is. 63:10). Pkn. ta Sawla cha siana nata adona liata a dua leipa ta Khazohpa reih a ngiah vei. Ano pachâ ta viahchao thawhpazy mietaku thawhpazy pahlôhpa ta Khazohpa biepiepa a dyuhpa vâta a chô liata Thlahpa Pathaihpa pavaosapa cha lâpa hawpa a châ. Chavâta Thlahpa Pathaihpa ypâ/tona tlai cha chyhsa châta byhnâ a châ.

Thlahpa Pathaihpa ta aypâpa chyhsazy chata hmotaotheina ama to. Zawsua cha Izarel sahlao Kana râh pangaikhei awpa

Mawsi vyuhpa ta Khazohpa ta a tlypa a châ. Mawsi ta a luh liata kuchahnaopa ta byhnâ a aw (Mal. 27:18, Ryh. 34:9). Ryureituhpazy: Kidia, Zaphatha, Manôah, Sasawna zy chhao ama râh nata chyhsazy pabohsa nawpa ta thatlôna byhnâzy sona byhnâzy patosapa ama châ (Ryr. 6:34; 11:29; 14:19). Sawla zy Davi zy chhao cha Izarel sahlaozy chhitha ta ama chariahpazy tawhta pabohsa thei nawpata thlahpa hmotaotheina pavaosapa ama châ hra.

Biehrai Parohpa liata chyhsa mopakha lia deita châ leipa zawpi hnohta chhao Thlahpa Pathaihpa raihria eima hmô hra. Izi tawhta Kana râh ama pangai nota Khazohpa ta ameihtôh nata meitôhpa hmâpa ta a chhitha ei (Pua. 13:21,22; 14:24). Meitôh nata ameihtôh zy cha Khazohpa thlahpa pamosana châ ta, thlalôhna ta khaina a pietuhpa a châ. Izi puasaina daihti deita châ vei, Babelaw seichâna tawhta ama vaw pua no chhao chhithatuhpa a vaw châ (Is. 63:11-12; Hak. 2:5). Seichâna tawhta ama vaw pua nota Thlahpa chhithana kyh eima hmôpa vâta, “molei a ropazy hnohta Thlahpa Pathaihpa rai a hria tyh” tah theipa a châ.

Chavâta Biehrai Parohpa liata Thlahpa raihriana dâh cha atlypa/araopa chyhsazy liata thlahpa ta sathaw thu tyh ta, anodeikua ama molei tita Thlahpa Pathaipa cha a lâ pakhua tyh. Chahasala, molei ama ro tita Thlahpa cha a piepakhua pyly ei.

Reipahmaoh awpa:

1. Biehrai Parohpa nata Biehrai Thiehpa liata Thlahpa raihria ananona, na pahnona hawhta chhopasia teh?
2. Atanoh eima awnanopa liata khei ta Thlahpa Pathaihpa rai a hria, reipahmaoh teh?

MISSION CHAKAONA LIATA THLAHPA PATHAIHPA RAIHRIA

Zisu ta a chhy ta a hnohta, chyhsa ahyrai chôlâ tawhta a pipathi leipa khiahtala Khazohpa khhinarâh hmô thei aw veih ei tah ta. Zisu ta a chhy ta, Hmeiseihta ta, hmeiseihta ta, ei cha chho, chyhsa ahyrai ti ta nata thlahpa ta ama pi leipa khiahtala Khazohpa khhinarâh liata angiah thei aw vei ei (Zhn. 3:3,5).

Mission chakaona liata Thlahpa Pathaihpa raihria hmiatuapa cha hro pathlaina (pipathina) raihria he a châ. Hro pathlaina raihria liata Thlahpa Pathaihpa raihria he a chhâh a chhâh ta a pazao lymâpa a châ. Pipathi thei nawpa ta hmiatua ta Thâtihpha pangia nawpa ta, ama pathipalôh pachhuapanoh chhielie tyh. Cha liata moleipa eima châzie a pahnopasiasa (Zhn. 16:8). He moleina ama pahnona heta pachhatuapa Zisu Krista peimawhzie a pahnosai ei. Cha tawhta Thlahpa Pathaipa ta, “molei ei châ” tahpa a pahnopazy hnohta molei rona nata ngiapâna hmosaipa a pie ei. Molei rona tahpa cha “moleina a heisai ta Zisu lâta kuana” a châ. Molei ro khohna palôhrupa pathipalôh liata eima hneipa tlai kha Thlahpa Pathaihpa hmosai piepa a châ. Moleina siesai ta Zisu pachhana a pahniena tlai cha ngiapâna a châ. Ngiapâna he a tao ta ma taopa chi châ leipa ta, a to ta ama topa chi a châ (Eph. 2:8). Thlahpa Pathaihpa hmosaipa a châ pyly. Chyhsa lâ tawhta molei rona cha Khazohpa tawhta molei ngiathaina nata a tyh tita ngiapâna he a vaw pihpa a châ.

Molei ro ta molei ngiathaina a to hawpazy cha ta “Zisu Krista cha Abeipa a châ” tahpa a châkheina ama hnei. Cha a châhkheina cha Thlahpa Pathaihpa tawhta a puapa a châ hra (1 Kaw. 12:3). Zisu Krista cha pakah ta achâhkhei ta palôhrupa ta

angiapâpa maih cha pachhana ama hmô aw (Raw. 9:10). Chavâta pachhana cha Thlahpa Pathaihpa raihria vâta eima vaw pahnopa a châ. Zisu Krista cha pachhatuhpa ta a pyhpazy hnohta ama pathipalôh liata Thlahpa hrypa ama châ (Raw. 5:5). Chatawhta chyhsapa pathipalôh liata chyhsa parohpa cha thlahpa chyhsa lâta a palie. A paliena dâh cha, Biehraï Parohpa liata ryhpa cha Mawsi ta lôphia lia ropa ta Izarel sahlao cha a pie ei. Thlahpa Pathaipa deikua, lôphia liata pie khao leipa ta Thlahpa ta “kyhpachâna ryhpa ama pathipalôh liata a ro (2 Kaw. 3:3). Chatanachata Thlahpa Pathaihpa cha ngiapâtuhpâ pathipalôh liata a pahrâpa a châ (Zhn. 14:16-18; 2 Kaw. 1:22). Ngiapâtuhpazy hro liata a pahra hawpa Thlahpa Pathaihpa cha eima molei pathlei ti ta pua khao vei. Chatlaina noh taih ta piepa châ haw pi ta, anodeikua ngiapâtuhpâ ta hmo a parao tita Thlahpa Pathaihpa cha a ru a chho (Eph. 4:30).

Mission chakaona liata hro a pathlaina he, zyna a pathlaina tlyma, awnanopa a pathlaina tlyma châ vei, Thlahpa Pathaihpa vâta pathipalôh a pathlaina a châ via pachai. Thâtihpha vâta pathipalôh pathlaipa châ leipa ta zyna a pathlaipazy, awnanopa a pathlaipazy cha Mission chakaona liata chichhihpa a châ. Chavâta Mission eima chakaona liata hro pathlaina raihria he Thlahpa Pathaihpa raihria a châ.

Reipahmaoh awpa:

1. Chyhsa pakha pipathi thei nawpa ta Thlahpa Pathaihpa raihriazy paziah teh?
2. Mission chakaona liata a pathlaina chichhipazy reipahmaoh teh?

24. MISSION CHAKAONA NATA PACHHANA KIPA

Paru hmâhpa cha paru awpa nata thie awpa nata parao awpa leipata cha a vy vei. Kei la hro ama hnei nawpata a kipa ta ama hnei nawpata a vya ei châ (Zhn. 10:10).

Mission chakaona he sapa nata thlahpa anuapa ta chakao awpa a châ. Chyhsapa cha pôhpa, thlahmihpa, nata thlahpa zydua pahlypa hro a hneipa a châ. Chavâta he hrozy he miakha nata miakha a pazaopa châ ta, patlua pachhaihpa ta chakao thaipa châ vei. Chyhsapa he he mia thôhpa pahlypa hrona a hneipa a châ. Cha mia thôhpa zydua pahlypa cha hrona kipa tah theipa châ. Chavâta chakaona rai eima hria tita he mia thôhpazy peimawhna mopata chakao awpa a châ.

Zisu Krista ta pachhana rai a hria tita, thlahpa pachhana deita hria vei. Molei ngiathaina rai dei hria vei. Sapa pôhpa a tlâh leipazy: mochaopa, byhsypa, aphawhpa, nata palôhru lâta a tlâh leipa: ahripa ta a patupazy, palôhrie theipa, hnabeidyapa, mâchhiesapa zy chhao patlâhna rai a hria. Chavâta Thâtihpha a chho nota, chyhsa hro liata amâ tyh haipa rairunazy a pathlâkhei lymâ. Tipo liata nga a patu haipazy nga patukhei ei ta, niepa a hnei khao leipa chyhsa sâhpangawh rih chhao a pabie. Mâchhie a sa haipa Matha nata Mary chhôhkha charei ta a chakhei hra ei. Hneirôh kaw taraw ta, noh chareih alyna noh rai a hnei leipa Zakia o tlôpa ta pachhana bie a phuah. Chavâta Zisu Krista Mission chakaona cha hrona kipa chakaona a châ.

Eima Missionary zy chakaona chhaohe Zisu Krista chakaona hawhta hrona kipa thâtihipha chakaona a châ. Lorrain ta Mara râh liata Mission a vaw chakao tita, patlâhna châta thohna o zy, sohna pachuna châta siku o nata Khazohpa bie chakaona, Biehrai paliena nata Thâtihipha chho awpa Kraws Pheisaih Training zy a hnei. Chyhsa hro: pôhpa, thlahmihpa nata thlahpa châta peimawhpa pachhana raihria ta mission a chakao hra. Chahawhta tiama kawpa ta chakaona hnei ta, atanoh Mara awnanopa cha pitlohpa awnanopa, sasyh a duahpa nata a chhithapa awnanopa lâta a palie.

MEC awnanopa chhao pachhana kipa Thâtihipha a chabapa ta Mission eima chakao hra awpa a châ. MEC awnanopa ta kô 50 chhôn mission a vaw chakaona liata “Kri pazysana nata Awnanopa paduana (achhyna o sakheina)” liata anua viapa a vaw chakao haw. Thlahpa kao lâta thâ ta a vaw chakao tahna a châ. Chavâta Mission Golden Zubili khôlâ ta Mission chakaona lia deikua hrona kipa Thâtihipha ta mission chakao thei bâ awpa a byuh. Khihsa tôhtuna liata peimawhpa raihria achuna (Skill Training) pie awpa a byuh ta, Siku y leina khih zy liata Siku o padua awpa a byuh. Eima Missionary zy he thohna mohôhna dâh pachu awpa a byuh hra. Chahawhta hrona kipa Thâtihipha ta awnanopa eima padua thei khiah awnanopa pitlohpa lâta eima kaw patlôsa thei aw.

Reipahmaoh awpazy:

1. Pachhana kipa Thâtihipha tahpa khapa ma a châ, chhopasia teh?
2. MEC Mission chakaona liata a phahla chaipa kha e a châ, reipahmaoh teh?

Thlarâh
(September)
25

MISSIONARYZY PASÔNA BYHNÂ

Ahyrai a cha lypa cha na lypa a châ. Ahyrai na lypa cha na tuatuhpa a lypa ama châ. Ahyrai hrosopa cha hrosopa a châpa vâta a lypa cha hropa lymâ a hmô aw. Ahyrai chyhsa siapa chyhsa siapa cha chyhsa siapa a châpa vâta a lypa cha chyhsa siapa lymâ a hmô aw. ahyrai he hawti chyhpata hry ta pakha he pachupa a châpa vâta ti chakua nyu kha a piepa cha, hmeiseihta ta, ei cha chho ei chu, ama lymâ cha lei chacheita aw vei tah ta (Mt. 10:40-42).

Biehrai Paroh liata Shuna chanô pakha y ta, vahpa hnei ta, anodeikua sawchapawpa hnei veih ei. Khazohpa chyhsa hrosopa Elaisa ta a khitlyna maih chapia tyh ei ta, ama o liata a tlô tyh. Chavâta Shuna chanô ta a vahpa hnohta he Khazohpa chyhsa he eima o liata a tlô tyhpa a châpa vâta eima o liata ngiaryhpa ta a y thei nawpa ta chhôpadâhzy taopa sila, rakho zy, dawkâh zy, dyuchhai zy, nata meiôh sona zy sopa sila, keimo lâ a vyna maih ta a ngia tyhna hâh ta (2 Ab. 4:8-10). Cha hawhna chata Elaisa cha a kih chapiana maih ta Shuna chanô o liata tlô tyh ta, paso kaw ei ta, Elaisa ta a chakaotuh Kehazi hnohta Shuna chanô châta khapa eima taopa awpa hiahri teh tah ta, anodeikua Shuna chanô ta eima chiheih hry ta a pahrâpa eima châna a byuh hraoh mapi a vaw tah haw. Kehazi ta Elaisa hnohta amo chhôhkha he sawchpaw hnei leipa eita, a vahpa hra cha machâ haw tlôh ta tah ta. Sawchapaw ama hnei thei nawpa ta byhnâ pie ei ta, kô kha a vaw pha na ta sawchapaw vaw hnei haw ei ta. Chavâta Shuna chanô cha Khazohpa chyhsa Elaisa cha pasô ngaitapa ta ama o liata a patlôsapa vâta ama ngiahna hawhta Khazohpa ta byhnâ a patosa ei.

Zisu pachuna liata hrosopa alyna byhnâ y ta, mosiapa alyna byhnâ y hra ta, Zisu a tuapa pachupazy alyna byhnâ a y hra a tah. Rev. Heisa ta a reipa cha, Kraws Pheisah zy Thâtihpha chhopa ta Mara râh ama chahryh nota Kraws Pheisah zy maniah a lypa ama ypa hawhta a ly leipa khih nata abeipazy ama y a tah. Chahry liata Lialai beipa Chhâkhâ cha ano o liata maniah patlôsa ta, khihsaw zawpizy miah pahmaohpa ta thâtihpha zy maniah a pachhosa a tah. Nochhi Mara râh liata achuna siku a vaw y tua chaina su cha Sabyhpi khih châ ta, chavâta Sabyhpi khih puapazy achuna liata amopâtlâh ama châ hmeiseih. Tedim chipho liata Thâtihpha a chho tuapa cha Rev. Dr. Cope châ ta, Tedim beipazy ta ama py leipa vâta Thohlaing khih liata Mission centre a tao. Chavâta Thohlaing mo cha byhnâ hluhpi to ei ta, ama khih tawhta chyhsa rônahpa hluhpi ama pua tahpa ama reih tyh.

Mara awnanopa lia chhaota he Mssionary pasôna byhnâ he eima vaw pahno pathao haw. Mara râh liata Thâtihpha a vaw tlô tuana noh cha September 26, 1907 a châ. He noh Awnanopa ta kô chareih ta Thâtihpha Tlô Noh tahpa a hmâ tyh. He noh he Mara awnanopa byhnâ to thei nawpa ta Missionaryzy alyna noh ta hmâpa a châ. Cha alyna cha Mara mo cha khichhai a pasopa eima châna hawhta Vaili mapaw he odyh to o patlôsa khaipa châ aw ta, Awh sakha chyu thiepa awpa a châ. Chavâta cha Awh achhyna o lâ vaw chei khaipa châ aw ta, chatawhta hmôpa sôh cha Mission chakaona châ so awpa a châ. Awh cheingei ahnei leipa chhao Awh sakha mâ nata a khopa tâkâ lâta pie awpa a châ. He hmo rônahpa eima hmôpa he Rev. Pa Hrang (Grace Paw) ta MCC delegate ta MEC Assembly â vaw hlao nota ryuhi bie a châ. Awnanopa he Missionary alyna sôh eima vaw hmâ tawhta kô 17 a pha haw. Chavâta atakô 2021 liata chhao eima missionary zy alyna sôh he eima chakao tiama heih awpa a châ aw.

Bie reipahmaoh aw:

1. Eima khih nata râh liata pachutuhpazy, thohna mohôtuhpazy, ryureituhpazy nata pastorzy he Khazohpa tuapazy ama châ tahpa nâ pyh ma? âmozy he byhnâ ama hnei hra aw ma, reipahmaoh teh?
2. Thâtihpha alyna sôh, Awh na thyupa vâta byhnâ na topa nâ pahno ma, paziah chhi ma y?

Thlarâh
(September)
26

THÂTIHPHA CHA NGIAPÂNA TA BYHNÂ TONA A CHÂ

Khazohpa châ bie chata Khazohpa ta ngiapâna vâta Zenitaihyz thai a pachâsa aw tahpa pahno chhieliêpa ta, “Nama liana cha ta pho to byhnâ topa ta ama y aw,” tahpa ta Abraha hnohta Thâtihpha cha a chhochhieliêpa kha. Abraha cha ngiapâ ta byhnâ patosapa cha ta, ano hawhna chata a ngiapâpazy cha byhnâ patosapa ama châ aw (Kal. 3:8-9).

Mara awnanopa cha 1907 September 26 noh tawhta chhuhpa ta 2021 September 26 taih kô 114 eima tloh haw. Atakô 2021 Mara râh Thâtihpha tlô noh liata thâtihpha vâta byhnâ tona kyh rei chanei heih awpa a châ vâta aly â chhieh hmeiseih. Marapa cha 2007 kô liata Mara râh Thâtihpha tlôna Zubili (Gospel Centenary) eima kyhchhikhei haw. Palôhawhpa ta 2007 Centenary a ô hawpazy cha Thâtihpha vâta byhnâ tona kyh he ama novâh kaw bâ awpa ta ei ngiapâ. He tlai he eima thâtih a châpa hawhta noai leipa ta rei chanei lymâ awpa tlai he a châ.

Byhnâ tahpa hawrawh he Khazohpa nata azaona a hneipa a châ. Chhiesana tahpa hawrawh deikua Sâtâ nata azaona a hnei. Byhnâ tahpa he Sâtâ nata hmâ pahlao thaipa châ leipa ta Sâta byhnâ tahpa y thai hra vei. Khazohpa ta khizaw he byhnâ a pie khohpa vâta a sawchapawpa Zisu Krista he a pie. Chavâta Zisu Krista pathla liata a pazao laihipa zydua cha byhnâ to awpa a châ. Luka châbu liata Zisu Krista pathlana Zisu tawhta pathaopa ta Ada chha taih eima hmô (Lk.3:23-37). Zisu pathlana liata moh paziahpazy liata chyhsa pho to amâ hlao. Chyhsa siapazy, chyhsa

moleipazy ama hlao. Chahrasala, he Zisu pathlana thâti heta maniah a chhopa cha moleipa chhao mosiapa chhao Zisu nata azaona a hneipa maih byhnâ ama to aw tahpa he a châ. Chavâta byhnâ tona kyh liata ano he kheihawhpa chyhsa ma a châ tahpa hlâta Zisu py a châ ma, a châ vei ma tahpa liata a pahnieh.

Thâti hpha cha Zisu nata maniah a pazaotuhpa a châ. Abraha byhnâ patosa awpa awpa a vaw châ (At. 12:1-3). He byhnâ patosa awpa ta Abraha ta Khazohpa a chhohia hlei leipa ta, asaoh nga hra vei. Khazohpa awna cha ngiapâna ta a py ta, ano byhnâ a piepa saw samoh zydua cha byhnâ patosapa a châ. Abaraha ta Aisika byhnâ pie ta, Aisika chata cha byhnâ cha Zakaw hnohta a pie heih. Abraha ta byhnâ a pie khao leipa Ishamela zy Esaw zy cha byhnâ a pazao lymâpa ri chapia khao veih ei. Cha hawhta Zisu Krista liata apazaopa maih cha byhnâ to awpa ta Khazohpa ta a vaw pachhuhpanoh chhielie hawpa kha a châ. Chavâta thâti hpha cha byhnâ hnawh a châpa Zisu Krista nata maniah a pazaotuhpa a châ.

Zisu Krista cha byhnâ hnawh châ ta, ngiapâna he daona tlâsy a châ. Chavâta Zisu hnohta byhnâ eima pazao khoh khiah ngiapâna tlâsy ta eima pazao awpa a châ. Ahyrai Zisu Krista nata azaopa ta a ngiapâpa maih byhnâ ama to lymâ aw.

Reipahmaoh awpa:

1. Sâtâ byhnâ a y thai ma, chhopasia teh?
2. Byhnâ tahpa he chhopasia teh?

Thlarâh
(September)
27

MISSION CHAKAONA NATA BEIPARI SÔH

Ama sie nawpa khih cha tlô daimâ hâ ei ta, Ano cha a hlâ via sie a chhuahpa hawhta y ta, chahrasala, thlyu ei ta, “Eima hnohta tlô ma y, zâlâ daimâ hâ ta, noh chhao a tla daimâ hâ hi” tah ei ta. Ama hnohta tlô awpa ta a ngiah hâ ta (Lk. 24:28-29).

Khasi râh liata nôhmei pakha heta awnanopa liata thyuna thyu awpa he khoh kaw tyh ta, chahrasala, thyu awpa cha hnei thei beih leipa ta, thyu hra awpa cha khoh kaw tyh tloh ta. Thyu thei nawpa kao pachâ ta, he hawhta a vaw tao. “Beih chho awpa ta sapha a li papua chiehpâ tawhta a kupazah hmo kha pha tyh ta, cha cha pachô lymâ ta, a pachôpa sapha cha tâkâ lâta ta palie ta, cha tâkâ cha thyuna sôh châta a vaw pie tyh. Chahawhta a tao tyhpa vâta niedo pha hla hlei leipa ta, thyuna sôh deikua a vaw hnei thei haw. Chahawhta a vaw taopa cha mohropa chhao vaw pahno lymâ ei ta, kawh via lyma ta, chatawhcha Khasi awnanopa liata Beihpari sôh he sôhnawh peimawh kawpa sakha ta ama vaw hmâh pathao.

Kô 1910 liata Pinô Zosaphllui nata Pinô Siniboni (Khasi) zy ta Khasi râh lâ ama sie nota Beihpari thâtih a vaw chu ei ta, pha ta ngâsa ei ta, Mission Compound liata Committee a ngiakheipa ta achhyna o sana nata niebaw pahla viapazy baona châta vaw hmâh tua eita, cha tawhta Mawrâh liata Beipari sôh he ama vaw hmâh pathaopa a châ.

Krizyha Nô Py â vaw dua tawhta Beihpari sôh chakaona he Mawrâh Nô Py tawhta a vaw chu pachhuah eita, 1957 Mara râh Krizyhna Zubili kô lia tla ta Beihpari sôh siekheina dâh siahliapa taopa ta khi to nata chhôn to ta ama vaw hmâ theipa a

châ. ECM awnanopa liata 1997 tawhta Beihpari sôh he Mission sôh liata ama vaw pahlao tua chai. ECM râh liata Beipari he byhnâ tokhei kaw eita, Kô 1956 kô liata Beihpari sôh thyuna zydua Rs. 190/- deita châ taraw atanoh 2021 kô liata Rs. 210 lakhs a pha haw. ECM cha Kô 2012 liata Beihpari Sunday vaw hnei pathao ei ta, March thla liata ama vaw hmâ tyh.

MEC râh liata chhao Beipari sôh he awnanopa Saikao a vaopa eima châ no tawhta vaw hnei tyhpa a châ. Chahrasala, a vaona siahliapa vaw y thei vei. Achâh ta General ta a vaw vao ta, a châh ta KNP a vao liata siekheipa châ heih ta, a chhana ta atahma Mission Department avaona ry liata sopa a châ. Marara Gospel Centenary arâpasuana liata Beihpari sôh he Mission châta hmâ awpa ta vaw pachhuahpanoh ta, Mission chakaona he rairuna eimâ vaw tyh pareipa vâta 2011 Mission nata Evangelism Committee he Ngephepi liata a kawh viapa ta taopa ta, cha liata Beihpari sôh he Mission sôhnawh a ipa tao awpa ta, cha kô liata Beihpari campaign he local to ta ama hneipa. Chatawhta Beihpari sôh he Mission sôh châta byhnâ vaw tokhei kaw pita MEC Mission chakaona sôhnawh a ipa lâta a vaw lie haw.

MEC ta Beihpari liata a ngiapâna dâh cha Zisu he eima chhôhkha member hawhta nie pie awpa he a châ. Chavâta my chareih sapha pâvâ nyu kha nata zâlâ sapha pâvâ nyu kha chyu Zisu châta patî eima chhopakiena a châ. Chavâta noh chareih ta eima Beipa Zisu Krista châta nie awpa pie chyu suh vy.

Reipahmaoh awpazy:

1. MEC ta ECM hawhta Beihpari Sunday hnei hra awpa ta pha na tah ma, reipahmaoh teh?
2. Beihpari soh hmâh a sie thei via nawpa ta kheita eima tao aw, reipahmaoh teh?

Thlaráh
(September)
28

BEIHPARI CHA NIEPA HLÂNA A CHÂ

Ano chata chyhsa zydua hnohta, “Ahyrai ei na zi khoh khiahtala ano a pachâ leipa ta, noh to a Kraws a pupa ta na zi se. Ahyrai a hro a pabohsa khohpa maihta pahlei aw ta, ahyrai keima vâta a hro a pahleipa maih ano tlai ta a pabohsa aw (Lk. 9:23-24).

Biehrai Parohpa liata atheihna hlâna hluhpi a ypa hry liata miakha cha “Niepa hlâna” he a châ. He niepa hlâna cha ama hlâ tita viahdie di ngaitapata hlâ awpa a châ. A yzie cha niedo châta direct ta tao thei awpa ta hlâ awpa a châ. Cha niepa hlâna cha theihthaizy lâta tlôkheipa châ aw ta, theihthaipazy ta ama vaw cheipahmaohpa viahdie cha kupazah kha la aw ta, sathaw nata ropahâhpa chhaota maihsa liata a hlâ awpa a châ. Alaibâhpa viahdie nata sathaw cha theihthaipazy niepa a châ aw. Niepa hlâna liata hmâpazy cha chho theipa tlyma, sathaw nypa ta pakâh theipa tlyma, chareihna beih ta chareih thei tlyma, Abeipa lâta chei theipa châ ta, anodeikua thihnô pahlao lei awpa a châ. Cha niepa hlâna ama hlâ ti ta ropahâhpa chhao ama hlâ awpa a châ. Cha ropahâhpa cha Khazohpa palysana a châ. Cha niepa hlâna eima hlâna chhâpa cha noh to eima hrona liata peimawh chaipa niedozy cha Abeipa ta lyu nata sadô tawhzy ta maniah a pazaopa vâta Abeipa lâta atheihna hlâna a châ.

Biehrai Thiehpa liata niepa hlâna kyh rona hmô khao mapi. Anodeikua Abeipa Zisu hnohta nie ama piena kyh zy deikua eima hmô hólô. Zisu ta chyhsa sahpangawh rih a pabiena kyh liata hawti pakha cha viahchha tlâ pangawh nata ngasa miano

a hneipa. Cha cha Zisu hnohta vaw pacheisa ei ta, Zisu ta byhnâ awpa ta, chyhsa sah pangawh rih a pabie tawhta alaipa hrâbyh miahrawhleino a châ (Zhn. 6:1-15). Zisu Krista thyuheihna hâta chhôn liata Zisu ta Emâsah lâpi liata a sienga penawh hnohta vaw luah ta, amozy chata ama hnohta patlôsa ei ta, Zisu cha zâpati dôh khoh awpa ta vaw hrua ei ta, pati ama vaw nie nata ama mozy pavâ ta ama hnohta a dôh hrâpa Zisu cha athyueihpa Zisu Krista a châ hi tahpa liahsa ama hmia ama vaw sieh thei haw (Lk. 24:28-32). Pachupa thokhazy cha Zisu thyueih khai tawhta chhaota nga patupa raihria heih eita, Zisu ta ama hnohta a phualuah heih ta, nga hluhpi patu ei ta, cha ngasa nata viachha ta Zisu pati nie hrua ei ta, cha tawh cha Zisu ta Pity hnohta “A mietaku pasa awpa a hrua,” heih (Zhn. 21:4:14). Chavâta Biehraï Thiehraï liata chhao Zisu hnohta niepa hlâna a piepazy cha byhnâ hluhpi ama to hra.

Beihpari he eima hrona châta peimawh ngaitapa a châpa vâta eima hrona tah theipa a châ. Mission chakaona vâta Beipari eima chhaih tahpa cha eima hrona eima chhaih nga tah theipa a châ hra. Keimo hro nawpa ta eima so tlakaihpa, Zerapha nôhmeipa hawhta, Abeipa Zisu châta my chareih nata zâlâ chareih ta nie eima piepa hro a pahleina a châ. Cha tlai vâna chata Beihpari ta Mission chakaona he maty tlu ta a py theipa a châ. Anodeikua Zisu ta bie maniah â taihpa cha hro a pahleipa cha hro a pabohsa a tah.

Bie reipahmaoh awpa:

1. Khapa vâta ma Abeipa lâta niepa hlâna ama chei?
2. Khapa vâta ma niepa hlâna Beihpari sôh ta mission chakaona he maty chakaona a châ?

BEIHPARI CHA ZISU PATI, MISSION CHAKAONA A CHÂ

Cha chhôhna chata a pachupazy chata a hnohta, “Pachutuhpa y, nie teh,” tah chaimah eita, chahrasala, ano chata ama hnohta, “Pati nama pahno leipa nie awpa ei hnei,” tah ta. Chatawhcha a pachupazy chata amo nata amo liata, “A nie awpa chyhsa ta ama vaw cheipa tlyma,” tah ei ta. Zisu ta ama hnohta, “Na tuatuhpa kohpa taopa nata a rahria paloh awpa he ei pati a châ” a tah (Zhn. 4:31-34).

Zisu Krista nata a pachupazy cha Zudia râh tawhta Kalili râh lâ ama vaw sie nota, ama sie tyhpa Zawda chavah nochhi lâ tawhta sie khao leipa ta, Samari râh siepahliepa ta ama vaw sie. Zu chyhsazy cha Samari chyhsazy he pa-i kaw ei ta, bie a chho lei, ti a do lei awpa a châ. Samari râh Saika khih tikhaoh liata Zisu nata a pachupazy cha ama paha, a pachupazy cha Saikâ khih lâta nohchho pati chalei awpa ta ama zu chhoh ta, Samari chanô pakha cha tikhao liata ti vaw thaih ta Zisu nata bie ama chho. Cha bie ama chhona liata Zisu ta Samari chanô cha ano cha ahyma a châ tahpa phualuah ta, Samari chanô ta Zisu liahsa ta Krista a châ tahpa a pahno hawpa vâta a tibyhzy siesaipta ta a khih chyhsazy hnohta Zisu thâti h a chho awpata khihchhoh lâ a zu (Zhn. 4:1-30).

Tikhaoh liata Zisu deita vaw y ta, a pachupazy cha khih tawhta nie cha vaw cheipa ta ama za tlô. Zisu cha pati pie a chhuah eita, Zisu ta “nama pahno leipa pati ei nie haw” a tah. Zisu ta reih pazao ta, “Na tuatuhpa kohpa tao awpa nata a raihria paloh awpa he ei pati a châ” a tah. Chavâta Samari chanô hnohta thâti hpha a chhopa he Zisu Krista châta pati a châ tahpa a sia kawpa ta pahno theipa a châ. Chakhiahtala, thâti hpha chho raihria he Zisu Krista châta pati a châ. Ahyraï thâti hpha rai eima chakao

nga nota, Zisu Krista cha pati eima pie nga hra tahna a châ chu. Cha tlai cha Paw Khazohpa ta maniah a pavaosa chyupa biepie rônah chaipa nata raipie rônah chaipa a châ tahpa ta eima rei chiehpa a châ.

Chavâta MEC awnanopa ta Beihpari sôh he thâthipha chhona chakaona chhaichhi phapa miakha ta a vaw hneipa hawhta Zisu pati (nie) piena miakha hawhta a vaw châ haw hra. Zisu Krist pati piepa hawhta Beihpari sôh cha eima py hawpa vâta my chareih nata zâ chareih ta Beihpari eima so awpa a vaw châ haw. Zisu Krista nie khi tlai so awpa châ awta, my pâvâ nyu kha, zâlâ pâvâ nyu kha chy sapha eima thla chakiepa a châ. Chavâta aly kawpa ta Zisu pati châta Beihpari sôh chakao tiamâ chy suh vy>

Bie reipahmaoh awpa:

1. Beihpari nata Zisu pati azaokhina chhopsia teh?
2. My nata zâ ta sapha beihpari eima piepa he Zisu pati châta a daih na tah ma, reipahmaoh teh?

Thlarâh
(September)
30

MARAPA NATA MISSION CHAKAONA

Khizaw khaihpa nama châ na. Tlâh laki liata khih a ypa cha nyu theipa châ vei. Chyhsa ta meiôh rao sala, bai ry liata so beih vei ei. Meiôh tôoh liata tlao ama soh tyh. Ochhôh liata a ypa zydua chôta a vaw khaih aw. cha hawhna hra chata khaihna cha chyhsa mohmô ta khaih se, chatanachata nama hmo pha taopa hmô aw ei ta, nama Paw avâ liata a ypa ama palyupalih thei aw. (Mt. 5:14-16).

MEC cha Mission a pahâhpa awnanopa a cha. Mission pahâhna thlahpa he eima missionary-zy tawhta eima chupa a châ. Eima missionary zy ta Kraws Pheisaih zy hnôhta ama pachupa thâtihpâa bie cha “Vârâh khoehhina nata Meitipo chi a chhizie” a cha. Cha kyh vâta Marapa cha thlapa leidiapazy thapasa thaina tha ta eima vaw chu. Thlapa leidiapa tlua awpa ta a chapa vâta Kraws Pheisaihzy cha rietheina papeisa leipa ta, ahripa chariah chi hra leipata ama vaw chakao laihna mission thlahpa he eima missionary zy ryuhi (legacy) a châ. MEC ta cha 1966 liana khata Mission chakao pathaopa châ ta, atahma cha kô 65 eima tloh haw. Atanoh taih liata cha Mission field mia 6 eima hnei. Khumi field (1966, hriatuh 14, member 2000), Mru field (1970, hriatuh 16, member 2323), Myo-khumi (1969- hriatuh 12, member 780), Lemro Chin (1970, hriatuh 13, member 3016), Asho (1994, hriatuh 12, member 765), Hletu (hriatuh 8, member 1322), nata EM office liata mo 4 ama châ. Hriatuhpazy he MEC awnanopa chhôn lia chakaotuhpazie ama pha.

Sôh hmôna kyh liata eima sôhnawhzy cha: Beihpari sôh, Mission thapasana sôh, Thâtihpâa Tlô Noh alyna sôh; EMM KTS, Charity Home, Mission sponsor nata designated sôhzy a châ. Sôh eima hmâna chhao he Mission liata hlao eima piena cha MEC râh liata eima piepa hlata ahlukh via. Kôkha châta mission lâta hmâpa cha 200205500 MMK kyats a cha nota MEC râh chhôn liata hlao liata hmâpa (including LTC) cha 212431500 MMK a châ. Eima Mission sôh hmâna dâh heta mission a pahâhpa tahpa ngiana miakha a châ. Mission sôh he income 306933370 MMK chata hmâpa 312195763 MMK a châ. Mission fund eima tuana dâh he moh tua si: Beihpari sôh, Vailimapaw pati awna sôh, Mission sari sôh, Thoparei sôh, Razohpa o (khih a ngiana liata), Mission sa sôh, Mission thyuna sôh (mission apakhyna), mission sponsor tahpa ta ama tao tyh. Moh pachhi ula, MEC hawhta mission sôh a tluapa khizaw liata hmô aw va chi. Eima sôh hmâna lia chhaota

General sôh 57% eima hmâ nota 37% he mission chakaona liata eima hmâh lymâ. Khizaw liata sôh hmâna kyh liata ahluk thei via chaipa ta 20% ry lâ he Mission châta ama hmâh tyh. Keimo cha Mission aveihpa Awnanopa cha pita he thapasana zy he Khazohpa tawhta byhnâ a cha. Eima tha a zeih khiah byhnâ eima to tlamaw leina lâta a vaw lie laih thei aw.

Mara sawzy pita ryureituh phapa zy, a thaisopa zy, a hneirôhpa zy nata chyhsa rônahpa hluhpi pua thei vei hra sila, Missionary hluhpi eima pua. Yangon liata Thâtihipha a chhopa pastor nata missionary zy hluhpi eima hnei. He he chipho byhnâ tona miakha a châ. Chavâta Mission Zulili liata eima tâh awkheina cha, “Mara awnanopa ta a pasâhsa chaipa, nata a piekheipa, nata âlyna chaipa cha Thâtihipha chhona” a châpa vâta Zisu krista Thâtihipha eima chho lymâ aw” eima tah. Marapa ta â pahnopasiapa biephuahna heih cha: Mara khaihna cha Krista Thâtihipha a châ. Awnanopa ahrana ta Thâtihipha chhona a sapapua. Mara awnanopa cha Thâtihipha vâta a hriapasapa a châ. Marapa byhnâ tona cha Thâtihipha chakaona a châ. Marapa apôhkhana cha Thâtihipha chhona a châ. Chavâta Mara awnanopa cha thâtihipha achhopa awnanopa a châ. Thâtihipha vâta khaihna eima hmôpa khizaw lâta puakheipa ta Khazohpa rônahna châta pakhaihsa lymâ suh vy.

Bie reipahmaoh aw:

1. Marapa chipho nohlaona he khapa a châ chhopsasia teh?
2. Khei ta Marapa he Mission a pahâhpa tahpa ngiana na hmô thei, reipahmaoh teh?